



K40,000 Win Moni

wanwan long 4pla
laki lain bai winim
K10,000
Sekim hau long joinim
resis insait long ol
stoa mipla makim



Bikpela SME bung bai kamap



Pinisim skul na kisim pepa...Moa long 1, 250 sumatin i greduet long namba 61 greduesen sere-moni bilong Yunivesiti ov Papua Niugini (UPNG) las wik Fonde na Fraide. Poto i soim pastaim presiden na sumatin lida bilong Hela na Sauten Hailans Studen Asosiesen long UPNG Medikal Fekalti, Dickson Hiru Olabe, i wakabout wantaim ol wanskul bilong em long greduet na kisim pepa.

OL liklik bisnis manmeri husat i laik painim ovasis bisnis patna o baim sampela samting long ovasis long kirapim liklik bisnis i mas rejista ol yet na kam long wanpela bikpela bung long Pot Mosbi.

Nem bilong dispela bung em i e-Commerce in SME Summit na dispela bung bai kamap long International Convention Center long Pot Mosbi long April 25.

Invesmen Promosen Atoriti (IPA) wantaim sapot bilong PNG APEC Binis Edvaisori Kaunsil (PNG ABAC) na ABAC China bai go pas long kamapim dispela bung.

Menesing Dairekta bilong IPA, Ivan Pomaleu, i tok dispela em i wanpela gutpela sans long larim ol liklik bisnis manmeri long PNG i kam harim sampela gutpela toktok ol manmeri go pas long bisnis long ol APEC kantri bai autim.

I gat 700 spes bilong manmeri long kam sindaun long dispela bung. Mista Pomaleu i tok ol manmeri husat i laik harim ol gutpela stori long kirapim bisnis i mas yusim dispela sans na rejista ol yet hariap wantaim IPA.

"Mipela i amamas long tokaut olsem wanpela meri Saina, husat i biknem meri long sait bilong e-Komes bai kam long dispela bung na toktok long sait bilong kirapim bisnis wantaim intanet na nupela teknoloji,"

Mista Pomaleu i tok.

Mista Pomaleu i tok Dianne Wang bai kam autim toktok long olsem wanem em i bin kirapim e-Komes bisnis bilong em, C-BET.

Eksekutiv Dairekta bilong Bisnis Kaunsil ov PNG, Douveri Henao, i tok Mis Wang bai kam autim sampela gutpela toktok we ol liklik bisnis manmeri long PNG i ken yusim e-Komes plet-fom bilong em long kirapim planti gutpela samting.

"Intanet i mekim bisnis i kamap isi. Tasol planti manmeri PNG i no save long dispela. Ol liklik bisnis manmeri long kantri bilong yumi i no save gut long yusim intanet long mekim bisnis.

"Mis Wang bai kam mekim sampela gutpela toktok. Em bai opim rot long larim ol SME i kisim helpim long arapela ol bisnis patna long ovasis.

"Sapos ol liklik bisnis manmeri i laik baim ol samting long ovasis, ol i bai yusim liklik mani tasol long baim. I gat ol rot long kamapim dispela kain samting i stap tasol planti bilong yumi no save.

"Dispela bung bai opim tingting bilong ol SME ona na helpim ol long strongim bisnis bilong ol wantaim ol nupela bisnis patna,"Mista Henao i tok.

Ol manmeri bai no inap baim mani long rejistresen. Em i fri rejistresen na ol i mas rejista wantaim IPA.

INSAIT:

Polis holim na sasim Jas na minista - P2

Lida mas bihainim lek mak bilong Sir Somare - P5



Wol Nius Moran putim kiau na dai - P19

Saina wokman i dai - Basamuk Rifaineri pas - P21

Unlimited talk time with friends

Get unlimited calls between bmobile-vodafone numbers for as little as K1 per day.

Dial ***777#** to subscribe.

76003555 or 1555
connect@bmobile.com.pg

www.bmobile.com.pg/unlimited

Polis holim na sasim jas na ministra

OL polisman i holim wanpela senia jas bilong Suprim Kot na Nesenel Kot na gavman ministra long pasin korapsen.

Polis Nesenel Fraud na Anti-Korapsen Dairektoret holim Jastis Sir Bernard Sakora long Mande moning, na holim Aten Jeneral na Jastis Minista Ano Pala long Tunde apinun.

Polis i holim Jastis Sir Bernard long Mande monin taim em i draiv i kam aut long haus bilong em long Gordon, Pot Mosbi.

Suprintendent Mathew Damaru i tok ol polisman i holim Jastis Sir Bernard bihain long ol i lukim olsem wanpela kampani bilong wanpela loya i salim K100, 000 i go insait long benk akaun bilong em.

Ol polisman i bin kisim Jastis Sir Bernard i go long Konedobu opis na askim em sampela askim, na ol i sasim em long judisal korapsen.

Bihain long em, Jastis Sir Bernard i bin kam arasait long K1, 000 beil.

Ol ripot i tok em bai sanap long Waigani Distrik Kot sampela taim long dispela wik.

Long Tunde apinun, ol polisman i holim Mista Pala long Jackson's intenesenel ples balus taim em i stap long Brisbane, Australia na kam long Pot Mosbi.

Ol polisman i holim em bihain long ol i lukim olsem Mista Pala i yusim moa K3 milien gavman mani.

Mista Damaru i tok Mista Pala

bin yusim dispela mani long benefitim em yet na tupela kampani. Mista Pala i tok em i no bin mekim wanpela stil pasin na em tok em bai stretim nem bilong em long kot.

Em bai sanap long Waigani Distrik Kot long dispela wik Fraide bihain long em kam autsait long K5, 000 beil.

Japan givim bikpela luksave long PNG

WANPELA bikpela kantri long Asia-Pacific rijon i luksave olsem PNG em i wanpela kantri we i ken saplaim ges long ol kasto-toma long Esia.

Minista bilong Petroleum na Eneji, Ben Micah, i tok Japan i luksave olsem PNG em i wanpela kantri we i ken saplaim oil na ges long maket bilong Japan na tu long ol arapela kantri olsem Saina, Saut Korea na Taiwan.

Mista Micah i mekim dispela toktok taim em i laik sapotim Minista bilong Foren Afeas, Ribink Pato, husat i bin autim toktok long olsem wanem Foren Afeas Diptamen i wok long kirapim ol nupela poroman wantaim sampela kantri.

"Japan i wok long



Ben Micah

givim bikpela luksave long PNG. I no olsem pastaim we ol politikel na bisnis lida bilong Japan i save givim luksave long mipela,"Mista Micah i tok.

Mista Micah i tok em i bin skelim dispela pasin bilong Japan taim em i bin kisim wanpela delegesen bilong PNG i go long Tokyo long painim maket bilong ges

PNG bai kamapim long namba tu LNG projek, Papua LNG Projek.

"Mi bin kisim siaman na menesing dairekta bilong nesenel oil na ges kampani bilong yumi yet, Kumul Petroleum, wantaim grup bilong gavman long stretim toktok wantaim sampela ol kampani husat i gat bikpela laik long baim ges bilong PNG.

"Pasin rispek na luksave ol i givim long mipela em bin narapela kain stret. Mi save go kam ong Japan, bipo yet taim mi skul mangi long yuni. Na mi save gut long olsem wanem ol i save givim luksave na rispek long yumi.

"Nau mi ken tokaut stret olsem Japan, husat i namba tu bikpela ikonomi bilong wol, i

luksave long gutpela samting mipela i wok long mekim long sapotim ikonomi bilong ol.

"Ol kampani bilong Japan i wanbel long mekim moa bisnis wantaim yumi. Tupela kampani i wanbel tu long baim LNG bilong Papua LNG Projek,"Mista Micah i tok.

Mista Micah i tok tenkyu long Praim Minista Peter O'Neill na Foren Afeas Minista Ribink Pato i mekim planti gutpela samting long strongim pasin poroman namel long PNG na Japan.

Em i tok Dipatmen ov Petroleum na Eneji i luksave tu olsem Japan em i wanpela bikpela na namba wan maket bilong oil na ges PNG i wok long kamapim.

No ken mekim las minit samting

OL gavman opisal bilong PNG husat i laik sainim ol bikpela tred agrimen wantaim ol arapela kantri na intanesenel ogenisesen i no ken kirap no gut na mekim ol las minit samting.

Ol i mas save gut long wanem samting ol bai mekim, wanem kain samting dispela ol tred agrimen bai kamapim long laip bilong ol manmeri, na gutpela na no gut bilong dispela kain ol agrimen.

Gavana bilong Oro, Gary Juffa, i mekim dispela toktok long Palamen las wik. Em i autim dispela toktok bihain long em i bin luksave olsem Tred, Komes na Industri Minista, Richard Maru, i no bin sainim PACER Plus agrimen.

Australia i bin kirapim dispela PACER Plus tred agrimen tasol PNG i no bin wanbel long sainim dispela agrimen bikos em i no gutpela agrimen long helpim ikonomi na manmeri bilong kantri bilong yumi.

Gavana Juffa i amamas long Minista Maru i luksave olsem dispela agrimen i no gutpela agrimen na i no bin sainim.

"Planti taim ol lida bilong PNG i



Gary Juffa

no save tingting gut na sainim ol dispela kain agrimen.

"Planti taim kantri posisen long wanem toktok long mekim na wanem samting long sainim i save kamap long las minit long sampela kain ba na ol lida i save spak pinis na kamapim kantri posisen," Mista Juffa i tok.

Em i tok sampela ol liklik kantri olsem Fiji, Tonga, Samoa na Tahiti i save redi gut tru na kam long dispela kain bikpela samit o bung.

"Tasol yumi PNG i no save redi gut na kam. Yumi save tingting long kisim travel alawens na raun nating long ovasis.

PPC Singura stopim strit sels long Madang

MADANG Provinsal Polis Komanda, Jacob Singura i tokim ol polisman bilong em olsem ol mas stopim olgeta kain strit sels o wokabout maket lain long wokim bisnis long ai bilong ol stua long Madang taun.

PPC Singura i mekim dispela toktok long Mande long taim bilong bikpela polis pereid i kamap long Madang taun polis stesin.

Mista Singura i tok strong olsem olgeta strit sels o wokabout maket nau mas stop na polis nau bai mekim save long husat ol lain i laik wokim strit sels nabaut long taun.

PPC bilong Madang i mekim dispela toktok bihain long bikpela hevi i kamap las Sarere long Madang we i lukim bikpela pait namel long ol lain bilong Westen Hailans na Sepik long Sagalau eria.

Ol lain Sepik i bin kukim planti haus bilong ol lain long Westen Hailans setelmen na i bin blokim not kos rot long las wik Sarere. Dispela hevi i kamapim bikpela pret tru long bisnis na gavman sevis olsem skul, haus sik, na ol arapela pablik sevis.

Stat long Mande i kam olsem no gat praimer i skul sumatin i

go kam long skul bikos long dispela hevi bilong pait namel long ol Westen Hailans na ol Sepik.

Memba bilong Madang na Minista bilong Transpot na Infrastraksa, Nixon Duban i givim K400,000 na Madang provinsal edministresen i givim arapela K400,000 long sapotim spesel polis operesein. Dispela operesen bai stap 30 de.

Nau yet bik lain polis bilong Lae na Bulolo i go stap long Madang long sapotim ol polis long hap long lukautim lo na oda na putim was olsem no gat moa hevi i mas kamap.

30 de Polis Operesen long Madang go het nau

BIKPELA kombain polis operesen wok nau o go het long Madang long mekim-save long husat lain i laik brukim lo na kamapim hevi long taun.

Madang provinsal gavman wantaim Memba bilong Madang, Nixon Duban i bungim K8000,000 long sapotim dispela bikpela polis operesen bihain long bikpela trabel i bin kamap long las wik Sarere taim ol lain bilong Westen Hailans na Sepik i pait i go kam na blokim rot.

Ol lain bilong Westen Hailans i lusim moa long 40 haus bilong ol long dispela birua.

Madang rot i go olsem long Not Kos eria long las wik Sarere i bin



Madang Town

lukim bikpela hevi tru i kamap taim ol lain bilong Westen Hailans and Sepik i kirapim bikpela pait na kukim ol haus na blokim rot na pairapim gan.

Dispela hevi long las wik Sarere i bin kamap bihain long dai bilong wanpela boskru bilong bas bilong ol Hagen long las mun na hevi ya

i surik i kam las Sarere. Madang Polis i traim hat tru long stopim dispela pait na i singautim helpim bilong ol polis mobail skwat bilong Lae na Bulolo husat i go long Madang na helpim long daunim hevi.

Madang Provinsal Polis Komanda, Jacob Singura i no amamas long ol tupela sait lain i

yusim gan na naip na wokabout long pablik rot na blokim pablik rot long las wiken.

PPC Singura i tokaut olsem polis nau bai soim atoriti bilong em olsem i gat lo i stap na husat lain i bikhet na brukim lo na blokim rot o karim ol samting bilong pait na wokabout long pablik em polis bai mekim save long ol.

Tangit no moa bosim PNG Power

NUPELA bod bilong PNG Power Limited (PPL) i rausim saspendet Sif Eksekutiv Opisa (CEO), John Tangit, na makim narapela nupela man i kamap bos.

Bod i makim Chris Bais i kamap nupela CEO bilong PNG Power bihain long ekting CEO John Yanis i risain las wik.

Taim pastaim bod i bin saspending Mista Tangit, Mista Yanis i bin stap ekting CEO bilong PPL tasol Mista Yanis i risain na bod i makim Mista Bais i kamap CEO las wik.

Siaman bilong PPL, Andrew Ogil, i tok Mista Bais i rait man long kamap nupela CEO bikos ol wok manmeri bilong PPL na bod i wanbel long em i kamap bos.

"Bod bilong PNG Power Limited i makim Chris Bais i kamap Ekting Sif Eksekutiv Opisa (CEO) bihain long

pastaim ekting CEO, John Yanis, i lusim wok," Mista Ogil i tok.

Mista Ogil i tok Mista Bais i bin wok longpela taim long PPL na ol arapela wok manmeri bilong PPL i save rispekim em.

"Bod i sapotim Mista Bais na i gat strongpela bilip long em i kamap ekting CEO bilong PNG Power.

"Bod bai sapotim em i kamap ekting CEO, na ol wok manmeri tu i luksave na sapotim em, bikos em i wanpela senia menesmen tim memba bilong PPL, na em i wanpela wok man husat i bin wok longpela taim long PNG Power."

"Mipela i luksave olsem Mista Bais bai soim gutpela lidasip na bringim stabiliti long PNG Power taim dispela kampani bilong gavman i nidim wanpela gutpela man long ranim," Mista Ogil i tok.

Dispela toktok bilong bod siaman bai lukim Mista Bais i kamap ekting CEO.

Long wankain taim, bod i rausim pastaim CEO John Tangit bikos ol i bin tok em i no bin ranim gut PPL taim em i bin stap CEO long yia 2009 i kam inap yia 2015.

Pastaim siaman Larry Andagali tu i lusim wok bikos NEC i bin rausim em long mun Mas dispela yia.

Tasol Mista Andagali i no wari long NEC i rausim em bikos em i bin mekim planti gutpela samting na sevim PNG Power taim kampani i laik bruk daun.

Mista Andagali i bin kamapim planti gutpela samting long kirapim moa pawa saplai long kantri, long daunim level bilong pawa blekaut, na long larim PPL i sevim moa mani na mekim winmani na givim i go bek long gavman, husat i seaholda bilong PPL.

Zeming: Sir Mekere no ken 'giaman'

DEPUTI Pati Lida bilong Pipols Nesanel Kongres (PNC) Pati Mao Zeming i tok pastaim praim minista Sir Mekere Morauta i wok long giamanim ol manmeri PNG.



Se Mekere

Mista Zeming, husat i Minista bilong Fiseris na Marin Riso, i tok Sir Mekere i wok long mekim 'planti giaman toktok' long pulim tingting bilong ol manmeri.

Mista Zeming i mekim dispela toktok bihain long Sir Mekere i bin autim wanpela toktok long sampela ol no gut samting gavman, aninit long lidasip bilong PNC Pati na Praim Minista Peter O'Neill, i wok long mekim long bagarapim kantri.

Wanpela bilong dispela ol samting Sir Mekere i tok em i

"Sir Mekere i bin kamap olsem wanpela dikteta taim em i bin kamap praim minista, maski ol pipel i no bin givim em sans long kamap praim minista tasol em i bin stilim lidasip.

"Ol pipel i no bin makim em i kamap lida long taim bilong ileksen. Em i bin kamap praim minista taim vot ov no konfidens i bin kamap. Bihain long en, ol pipel i no bin makim em i kamap praim minister gen long 2002 ileksen.

"Sir Mekere i bin bagarapim ikonomi bilong dispela kantri na daunim namba bilong planti pabik sevan manmeri.

"Em i bin daunim namba bilong ol ami na polis fos. Sir Mekere i bin yusim polis fos long kilim ol sumatin long yuni-

vesiti taim ol i bin mekim protes mas long stopim len mobalaisesen.

"Em i no bin larim ol sumatin i kamapim gutpela dibeit tasol em i yusim polis fos long kilim ol yuni sumatin, ol pikinini bilong yumi yet.

"Em i no bin yusim gut mani bilong PNGSDP na o pipel bilong Westen i safana kisim bikpela taim. Em i westim mani bilong pipel long sampela kain samting we ol manmeri long ples bai no moa kisim benefit.

"Sir Mekere i mas pasim mas na no ken toktok moa long politik bikos ol pipel i no bilip long em. Sapos em i sanap gen long ileksen, ol pipel bai no inap votim em gen," Mista Zeming i tok.

Ailan manmeri laik marit autsait

LEVEL bilong solwara i wok long kirap na i no long-taim solwara bai daunim ol liklik ailan long Is Sepik, Wewak Ailan LLG Presiden, Pius Bugatar, i tok.

Mista Bugatar i tok ol lida bilong Wewak Ailan LLG i wok long stretim wanpela pepa long arim ol manmeri bilong ailan i lusim ples na go marit autsait o lusim ailan na go marit long inlen.

Wewak Ailan LLG gat moa long 10-

pela ailan tasol ol bikpela ailan em, Biem, Ruprup, Kadovar, Walis, Tarawai, Kairuru, Koil, Voeko, Mushu na Wei.

Moa long 15,000 manmeri i stap long dispela 10-pela ailan tasol birua bilong klaimet senis i wok long kamapim planti hevi long ol dispela ailan.

"Level bilong solwara i wok long kirap. Bikpela populesen bilong manmeri tasol kaikai na wara i sot.

"Na i no gat gutpela gavman sevis long helpim ol dispela manmeri.

"Dispela i mekim mipela i kamapim wanpela polisi ol i kolim 'voluntari meris'. Ol yangpela manmeri bilong ailan bai lusim ples na marit go aut long arapela ples insait long provins," Mista Bugatar i tok.

Em i tok ol i les long lusim ailan tasol birua bilong klaimet senis i kirapim level bilong

solwara na dispela bai daunim ol liklik ailan.

"Taim weda peten i wok long senis, dispela bai kamapim hevi olsem sotim kaikai na wara. Mipela i les long ol pikinini bilong mipela i bungim kain hevi olsem," Mista Bugatar i tok.

Em i tok long abrusim hevi bilong klaimet senis, wanpela wei em long lusim ailan na go stap long meinlan.



Wewak Ailan LLG Presiden, Pius Bugata antap long Boys Town Wewak.

SAVING FOR A REASON?

BEFORE

SAVINGS IN A JAR

- ✓ Easy access to spend.
- ✓ No interest earned.
- ✓ Funds are not secure.

NOW

SAVINGS BSP PLUS SAVER

- ✓ No Card Access.
- ✓ Tiered credit interest.
- ✓ Linked to Mobile & Internet Banking.

A BSP Plus Saver Account for every savings goal

- Home Equity
- Dream Wedding
- Medical Bills & Emergencies
- Birthday Party
- New Gadgets & Phone
- Overseas Holiday

www.bsp.com.pg [f](#) [t](#) [in](#)

Rong pasin long salim graun

WANPELA komyuniti lida long Pot Mosbi, Peter Nupi i tok pasin giaman bilong sampela opisa bilong Fisikel Planning na Lens long kisim na salim graun i wok long kamapim planti hevi long Pot Mosbi.

bringim bek gutpela nem bilong dipatmen.

Planti pipel i bin wok long mekim bikpela toktok long ol kain pasin bilong sampela opisa i gaimanim planti manmeri long ol i wokbung wantaim ol ausait lain husat i gat mani na i wok long kisim ol graun nating na i no bihainim lo bilong kisim graun.

Mista Nupi husat i save stap long hap graun bilong seksen 17, Alotmen 10 i tok olsem long yia 2010 long wanpela kampani, i bin kisim wanpela taitel bilong

seksen 17, Alotmen 9 we i bin stap long sevei plen pastaim tasol bihain ol i bin putim i go insait long seksen 17, Alotmen 14 na 13.

Nupi i tok olsem ol senia opisa i bin pasim tok wantaim kampani na ol i givim taitel we lens bod i no givim tok orait long en.

“Dispela hap graun em i no rejista, tasol hariap tru insait long wanpela mun na yia tasol ol i katim i go long 67 hap graun na redim long salim, we i no bihainim lo bilong Lens Ekt 1996,” Nupi i tok.

Em i tok dispela pasin i brukim lo bilong lens impruvmen kavanen long Len Ekt 1996.

Nupi i tok wanpela hap bilong dispela graun em ol i salim i go long wanpela len ona kampani long mani mak bilong K12 milien tasol dispela hap graun i no inap salim long dispela kain bikpela mani.

Lens Minista Benny Allan i bin tok i no longtaim i go pinis olsem em i givim tok oda i go long nupela seketeri bilong lens Luther Sipison long wokim wanpela stok tek long olgeta eben di-

velopmen graun insait long NCD na long Morobe Provins.

Insait long Palamen, i no longtaim i go pinis, Minista Allan i tok sampela pipel insait long ol yia i go pinis, i save pasim tok wantaim ol opisa bilong Lens Dipatmen na ol i salim ol Eben Developmen Lis (UDL) na em i kamap bikpela hevi, tasol nau Len Ekt riviui bai stretim.

“Sampela pipel i kamap miliena wantu tasol bikos ol i salim ol ULD nating,” Mista Allan i bin tokim palamen.

ADB tokaut long Ikonomi bilong kantri

ESIA Developmen Benk (ADB) opis long Pot Mosbi, las wik i bin tokaut long lukluk bilong ikonomi bilong PNG wantaim wanpela ripot ol i kolim “Esien Developmen Autluk 2016” long skelim wei bilong ikonomi i gro long Esia na Pasifik Rijon wantaim Papua Niugini.

Tupela bikpela ikonomis wokman bilong Esia Developmen Benk Opis i long Pot Mosbi i bin givim toktok bilong ikonomi bilong Esia na long Papua Niugini yet.

Dispela ripot bilong Esia Developmen Benk (ADB) i tok, Papua Niugini em i lukim bikpela senis long

ikonomi insait long sab rijon bilong Westen Pasifik insait long las 10-pela yia, tasol nau kantri i bungim bikpela hevi bilong mani bikos ol prais bilong ol samting bilong salim i go long narapela kantri long wol em i pundaun i go daun na abrusim mak bilong ol mani we i kamap long ol mineral sekta na tu long senis bilong ol weta.

Bikpela ripot bilong ADB, enuel ripot 2015 Esian Developmen Benk Autluk (ADO) i tok gro bilong ikonomi long PNG bai kisim mak bilong 4.3 pesen tasol long 2017.

“Senis bilong ikonomi bai bikpela samting tru

long Papua Niugini sapos em i laikim ikonomi long gro yet,” Mista Marcelo Minc, Kantri Dairekta bilong ADB long Papua Niugini Residen Misin i tok.


“Kamapim gut infrastraksa na kisim moa wok i kam long praivet sekta em i stap namba wan long kamapim wanpela ikonomi we bai gro bikpela,” em i tok.

Dispela ripot i tok olsem lukluk bilong PNG ikonomi long namel taim i luk orait, bikos i gat bilip olsem ikonomi bai go antap gen long yia 2018, tasol em sapos PNG i menesim gut ikonomi bilong kantri wantaim ausait wol long dis-

pela sotpela taim. Inflesen o mak bilong mani i go antap em dispela ripot i tok bai i go antap abrusim mak bilong 6.0 pesen long 2016 na bai stap wankain yet long 2017.

Taim oil prais long wol i bin pundaun, em i bin daunim strong bilong ol invesmen long mineral sekta, we i bin stap olsem strong bilong ikonomi long gro longpela taim, inap longpela taim, na em bai stap yet olsem bun baksait bilong ikonomi i gro long namel taim wantaim kirap bilong ol bikpela maining projek.

Konsevesen raun bilong ol pikinini



Edukesen opisa i stori long ol pikinini long wei bilong lukautim nesa. Wanpela moran snek i slip long gras long fran bilong ol pikinini.

POT Mosbi Nesa Pak i statim gen program bilong ol Pikinini Konsevesen skul holide stat long 19 Epril na bai pinis long 20 Epril.

Dispela bilong mekim ol pikinini amamas na long lainim samting tu long nesa long wankain taim bilong holide.

Program em i orait long ol pikinini

husat i gat krismas 7 i go long 16 yia na ol bai ranim long tupela grup. Wanpela bilong ol pikinini namel long 7 na 11 yia na narapela bilong ol 12 yia i go long 16 yia.

Tingting bilong dispela program em long skulim ol pikinini long wanem samting bai kamap long ol ples bilong pilai olsem

nesa konsevesen pak.

Program bai ran long hap pas 8 klok moning taim i go pinis long hap pas 2 long apinun long Tunde 19 na Trinde 20 Epril. Wanpela pikinini bai baim K25 long go insait na dispela bai karamapim belo kaikai na ol narapela pilai na skul insait.

Kids For Conservation

05 - 06 Apr.
19 - 20 Apr.

APRIL HOLIDAY PROGRAM

- Time: 8.30am to 2.30pm
- Dates: Tue - Wed 5 & 6 April
Tue - Wed 19 & 20 April
- Location: Port Moresby Nature Park (Next to PCM National High School, University)
- Cost: K25 per child includes entry, lunch & activities
- What to bring: Water bottle, camera, proper covered shoes

- 7 to 16 years
- Terms & Conditions Apply
- Reservations & prepayment required to secure your place
- Strictly limited numbers. 20 kids per age group per day
- Payments & cancellations are non refundable

Every child will receive a "Kids for Conservation Certificate"

ACTIVITIES
ANIMAL ENCOUNTERS
GO BEHIND THE SCENES
SEE CONSERVATION PROGRAMS
FUN GAMES

To Book :
326 0248 / 326 0258
Email: reservations.pomnp@gmail.com

PORT MORESBY NATURE PARK

Program pepa bilong dispela taim.



RAMU SISTEM I PAS

PNG PAWA I TOK AUT LONG OL JENEREL PUBLIC LONG LAE, MADANG NA LONG OL HAILANS SENTA OLSEM PNG PAWA BAI KARIM AUT WANPELA LOD SEDING WOK LONG DISPELA WIKEN.

DISPELA I KAMAP LONG WANEM YONKI PAWA STESIN BAI KLOS DAUN LONG OL WOKMAN BAI MEKIM MENTENENS WOK LONG TUPELA MASIN I STAP LONG PAWA STESEN.

PAWA STESEN BAI PAS LONG 2 KILOK LONG SARERE MONING LONG 16 EPRIL 2016 I GO INAP LONG 12 KILOK MONING LONG SANDE , 17 EPRIL 2016.

PROGRAM BILONG LOD SHEDING O TAIM BILONG PAWA BAI I GO AUT BAI KAMAP LONG NESINOL NA POS KORIA NIUSPEPA LONG TUMORA FRAIDE 15, EPRIL 2016.

MIPELA I ASKIM OL KASTOMA HUSAT I GAT STEN BAI JENERETA, SAPOS OL I KEN USIM LONG DISPELA TAIM BILONG PAWA I PAS.

PNG PAWA I TOK SORI TRU LONG DISPELA TAIM NA LONG OL HEVI I KAMAP TAIM PAWA I PAS.

Toksave i kam long PNG Power Corporate Relesens
Date: 14th April, 2016

Trukai Fil De

SASTENABILITI na nupela wei bilong egrikalsa em i bikpela toktok bilong Trukai Fil De we bai kamap long tumora, Fraide 15 Epril long Erap, Morobe Provins.

Rais na Egrikalsa Dvelopmen Fil De em i wanpela bikpela egrikalsa bung bilong Trukai Industri, na em i save soim ol kain kain aktiviti na samting bilong soim. Dispela bung long Fraide bai strongim tingting bilong 'Dvelopim Integreted Faming Sistem bilong Fud Sekyuriti long PNG.

Trukai Egrikalsa Menesa, Jarrod Pirrie i tok long dispela de ol bai toktok moa long namba wan prodak bilong Trukai.

"Ol toktok bai stori long wei bilong planim na kamapim rais tasol moa long wei bilong planim kain kain samting long wankain hap graun tasol we bai putim gris long graun gen taim narapela samting i gro na yusim pinis. Kain samting olsem Mung bin na stokfid bai i stap olsem ol kaikai we inap stap longpela taim." Mista Pirrie i tok.

Long dispela taim tu bai Sif Eksekutiv Opisa bilong Trukai Industri, Greg Worthington-Eyre bai toktok long opim dispela de na

tu Minista bilong Egrikalsa, Tommy Tomscoll.

Minista Tomscoll em i no nupela long tok-tok long ol Fil De bilong Trukai Industri. Las yia em i toktok tu long wankain taim na singaut long ol lokal rais fama na ol lain bilong wokim rais long ol i mas stop long kisim rais bilong ausait i kam insait long PNG.

Program i gat nem bilong Vais Sansela bilong UNITECH, Dokta Albert Schram na Gavana bilong Morobe Provins, Kelly Naru tu long ol bai mekim sampela tok.

Long namba wan taim dispela yia, ol lain i kamap bai lukim wok bilong Trukai insait long provins wantaim wanpela helikopta long ol bikman na bikmeri long go long Chingwam rais pailot projek.

Mista Pirrie i tok Chingwam rais fama bai stap long dispela de tu. Wantaim ol tu bai gat ol fama bilogn Sentral Provins, Wes Nu Briten, Naramangi na Sibi, na ol groa bilong narapela provins tu bai kamap. Ol narapela grup olsem Meri long Egrikalsa Dvelopmen Faundesen na Oro Rais Groa Kopretiv tu bai stap long dispela bung.



(L-R) CEO bilong Trukai Industri, Greg Worthington-Eyre i toktok wantaim Minista bilong Egrikalsa na Laipstok, Tommy Tomscoll.

Lida mas bihainim lek mak bilong Sir Michael

WANPELA gutpela wei long tok tenkyu long ol biknem na gutpela lida bilong kantri bilong yumi olsem Gren Sif Sir Michael Somare em long bihainim pasin bilong em, Oposisen Lida Don Polye i tok.

Mista Polye i bilip long bihainim lek mak na ol gutpela samting Gren Sif Sir Michael i bin mekim insait long moa long 40 yia em i bin stap long politik long PNG.

Sir Michael i bin trenim na lukautim Mista Polye taim em i bin kam insait long nesanel politik.

Politikel lek mak bilong Polye em bihainim stail bilong Mista Somare, husat i bin lainim em long planti samting.

Mista Polye i bin stap Deputi NA Pati lida bilong hailans rijon na kamap Deputi Praim Minista bilong Gren Sif taim em i bin stap praim minista long namba 8 tem bilong Nesanel Palamen.

Em i tok Sir Michael i no bin mekim wanpela no gut samting long bagaapim dispela kantri. Em i bin lukautim PNG olsem wanpela liklik pikinini na holim gut tru long han bilong em.

Mista Polye i bin autim dispela toktok long Wewak las wik Sarere taim em i go lukim namba 80 bondei pati bilong Gren Sif.

Mista Polye i bin sori long harim olsem lapun man ya bai lusim nesanel politik. Tasol em i amamas olsem Sir Michael i bin strongim as bilong pasin demokrasi long PNG wantaim strongpela Mama Lo, rul ov lo na jastis, sistem bilong gutpela gavman, na arapela ol institusen bilong strongim demokrasi.

"Mi laikim yumi ol lida na pipel bilong dispela kantri long bihainim dispela ol pasin long olgeta de long wokples bilong yumi.



Sharon i holim pas long Ledi Veronica taim Mista Polye i holim pas long Gren Sif Sir Michael.



Meri bilong Oposisen Lida Don Polye, Sharon Polye i holim piksa bilong Polye na Somare taim Gren Sif em yet i holim long narapela sait.

"Yumi no ken toktok na bikmaus nating long maus tasol yumi mas bihainim na mekim eksen stret long kisim dispela kantri i go antap long narapela level," Mista Polye i tok.

"Dispela em i wanpela rot na wei long helpim dispela yangpela

kantri bilong yumi i gro na tu long soim olsem mipela ol yangpela lida i wanbel long dispela ol gutpela samting Gren Sif i bin putim long sistem bilong gavman bilong yumi long PNG," Mista Polye i tok.

Mista Polye i autim tok amamas bilong em i go long Sir Michael

bikos em i tok planti ol bikpela disisen Sir Michael i save mekim em long kamapim bel isi na long gutpela bilong dispela kantri tasol.

"I no bilong larim wanpela o tupela manmeri tasol i kisim benefit. Em i save mekim gut ol disisen long larim olgeta manmeri long

kantri i kisim benefit," Mista Polye i tok.

Em i tok Sir Michael i save kamap olsem wanpela wok boi bilong ol pipel, i no olsem ol lida husat i save ting olsem ol i antap moa long ol pipel.

DWU nau i kamap wanpela CISCO Ekedemi

Divine Word University (DWU) nau i kisim luksave olsem em i wanpela skul we ol sumatin inap long lainim long Cisco Sistem bilong kompiuta network.

Long pinis bilong las mun, ol wokman na wokmeri bilong yunivesiti i bin kisim setifiket long wanpela bikpela intenesenel instituisen Royal Melbourne Institiut bilong Teknologi (RMIT).

Sikstin (16) akademik wokman na wokmeri long dipatmen bilong Infomesen Sistem Menesmen (IS) na Matematiks na Kompiuta (MCS) wantaim ol teknikel wokman bilong Infomesen Teknologi Komyunikesen (ICT) i kisim Cisco Setifaid Netwok Asosiet (CCNA) Sefitiket long Fraide long DWU Madang Kempas insait long haus kaikai bilong ol tisa.

DWU Deputi Presiden, Profesa Pamela Norman i tok tenkyu long Royal Melbourne Institiut bilong Teknologi (RMIT) long givim wanpela trening tisa long makim Cisco.

Profesa Norman i tok dispela trening i kamap long wok bung bilong DWU na RMIT na Cisco long



Thadreina Abady wanpela lekserea, i kisim CCNA setifiket long Profesa Peter Anderson.

planti yia i go pinis.

Profesa Norman i tok dispela trening em i wanpela bikpela hap mak bilong DWU long em i givim moa save long ol akademik na teknikel tisa na woklain long kisim moa save long wok.

Em i tok amamas long ol lain i kisim setifiket long givim sampela taim bilong ol long holide na mekim dispela trening long Januери 2015 na long Januери 2016 long

pinisim gut trening. Nau ol lain i kisim sertifiket i kisim akreditesen olsem instrakta bilong nupela Cisco Ekedemi nau i stap long DWU.

Namel long ol lain husat i kisim setifiket em Het ov Dipatmen bilong IS na MCS Profesa Peter Anderson.

Prof Anderson i tok em i bilip tru long ol wokman na wokmeri long ol i pinisim gut trening bikos ol i



Amyd Amden wanpela senia ICT tisa, i kisim setifiket long Profesa Peter Anderson.

wokim gut stret.

Em i tok, i gutpela long lukim ol DWU tisa na ol woklain we planti bilong ol i yunivesiti greduet bilong Yunivesiti, long ol i lainim gut samting long kamap Cisco instrakta."

Em i tok ol tisa na ol teknikal woklain i pinisim gut trening long pepa na long prektikel asesmen bilong olgeta 4-pela CCNA modul insait long 6-pela de strongpela

wokshop tupela taim. Ol i lainim samting long klasrum na long prektikel tu long Januери 2015 na 2016.

Olsem na DWU nau em i kwalifai long kamap wanpela Cisco Ekedemi wantaim namba wan 124 (81 man na 43 meri) andagreduet sumatin nau i stap pinis wantaim netacad.com.

Ol i yusim CCNA na Linux yunit bilong Cisco karikalalam.

Pablik sevan kisim salens long wok wantaim gutpela tingting



Ol opisa bilong DIRD husat i kisim trening setifiket, i sanap wantaim Ekting Seketeri bilong DIRD, Paul Sai'i bihain long ol i kisim setifiket bilong ol.

Papua Niugini i nidim tru ol pablik sevan husat i gat gutpela tingting bilong mekim gutpela wok na long muvim kantri i go lukim ol bikpela gol bilong Visen 2050 i kamap.

Ekting Seketeri bilong Dipatmen bilong Implementesen na Rurel Developmen Paul Sai'i tok long dispela wik taim em i givim aut ol setifiket long ol opisa bilong dipatmen i pinisim wanpela wik bilong indaksen trening we ol Papua Niugini Institiut bi-

long Pablik Edministresen i holim long Pot Mosbi las wik.

Mista Sai'i i tok pablik sevis sistem i save kisim tok bilas planti taim nating bikos ol lain i no save klia gut long wanem wok bilong wan, wan seksen bilong pablik sevis. Dispela kain tingting krangi long ol pablik sistem i mas senis wantaim gutpela edukesen na trening long ol pablik sevan long ol i ken kisim gutpela tingting long mekim wok bilong helpim nesen.

Em i tok slek pasin long wok i save mekim wok i no kamap gut long olgeta level bilong ol ogenaisesen o dipatmen.

"Yupela i mas olgeta taim bihainim ol Jeneral Oda, mekim wok olsem ol profesenel na kam long wok long taim. Yupela i mas save gut long wanem ogenaisesen yupela i wok long en.

"Tingting long laik bilong ol pablik na putim sevis bilong ol i go pas long ol wok bilong yupela yet. Helpim

olgeta pipel wantaim gutpela pasin, smail na rispek, na mekim gut wok wantaim gutpela tingting," em i tok.

Em i tokim ol woklain long ol i mas mekim wankain pasin long olgeta lain, na i no ken helpim wanpela na les long helpim narapela wantaim jastis, ikwaliti na rispekim laip bilong wan wan man, rait na fridom bilong ol.

"Yupela i mas wok strong long daunim pasin bilong injastis, na inikwaliti

long sosaiti," Mista Sai'i i tok.

Mista Sai'i givim salens long ol opisa long ol i mas givim stretpela na trupela toksave we ol pipel bai save gut na tu long givim tok save bek long taim long ol Memba bilong Palamen na ol bos bilong ol seksen na dipatmen.

"Wok strong long kisim hai standet bilong etiks o gutpela tingting, stuwod-sip, long pablik sevis, olsem ogenaisesen we i save helpim ol pablik," em i tok.

Ailan manmeri laik marit ausait

LEVEL bilong solwara i wok long kirap na i no longtaim solwara bai daunim ol liklik ailan long Is Sepik, Wewak Ailan LLG Presiden, Pius Bugatar, i tok.

Mista Bugatar i tok ol lida bilong Wewak Ailan LLG i wok long stretim wanpela pepa long larim ol manmeri bilong ailan i lusim ples na go marit ausait o lusim ailan na go marit long inlen.

Wewak Ailan LLG i gat moa long 10-pela ailan tasol ol bikpela ailan em, Biem, Ruprup, Kadovar, Walis, Tarawai, Kairuru, Koil, Vokeyo, Mushu na Wei.

Moa long 15, 000 manmeri i stap long dispela 10-pela ailan tasol birua bilong klaimet senis i wok long kamapim planti hevi long ol dispela ailan.

"Level bilong solwara i wok long kirap. Bikpela populesen bilong manmeri tasol kaikai na wara i sot.

"Na i no gat gutpela gavman sevis long helpim ol dispela manmeri.

"Dispela i mekim mipela i kamapim wanpela polisi ol i kolim 'voluntari meris'. Ol yangpela manmeri bilong ailan bai lusim ples na marit go aut long arapela ples insait long provins," Mista Bugatar i tok.

Em i tok ol i les long lusim ailan tasol birua bilong klaimet senis i kirapim level bilong solwara na dispela bai daunim ol liklik ailan.

"Taim weda peten i wok long senis, dispela bai kamapim hevi olsem sotim kaikai na wara. Mipela i les long ol pikinini bilong mipela i bungim kain hevi olsem," Mista Bugatar i tok.

PNG Polis holim pasim man i kilim Reza Barati

I kam long ABC
POLIS long Manus Ailan i tok em i bin kisim wanpela wik long ol woklain long Manus haus kalabus i tokaut long Joshua Kaluvia, wanpela long ol man ol i sutim tok long kilim asailam sika bilong iran, Reza Barati long Manus ditensen senta long 2014 .
Kaluvia i bin wok wan-

taim Salvesen Ami na i wanpela long tupela man ol i bin sutim tok long en i bin ronawe long haus kalabus long Mas 28.
Kaluvia i sapos long kamap long kot long Lorengau long dispela wik tasol em i bin ronawe long polis kastodi long Lorengau haus kalabus.

Trail Jas, Nicholas Kirrowom i bin salim waren long kamap long kot gen long Epril 18.
Long las yia, Kaluvia i bin tok em i gilti tasol long painim hat long painim Kaluvia taim ol i bin tok olsem em i wanpela saspek long dai bilong Reza Barati, na ol



Reza Barati

i bin holim pasin em long Wes Nu Briten.
Samting olsem 70 asailam sika i bin kisim bagarap long meknais na tranel i bin kamap long Manus AilanDitensen senta long Febueri 2014.

Ol polis I holim gen Joshua Kaluvia

Manus Provinsal Polis Komanda Senia Inspekta, David Yapu, i tokaut olsem Koreksenenel Sevis na Polis tim, na ol pipel long Manus i bung wantaim na holim Joshua Kaluvia, husat i bin ranawe long kalabus.
Kaluvia i no bin winim kot long em i kilim wanpela man long Irian asilum sika, Reza Berati, long

Manus Rijinal Prosesing senta.
Em i bin ranawe long han bilong ol Koreksenenel Sevis long Manus long Mas 28, taim ol i lokim em.
Ol polis na koreksenenel sevis i wok wantaim na holim em long Lorengau taun long Sarere.
"Spesel operesen tim i painim Kaluvia long Sarere na em i bin go stap long Lom-

brum. Ol operesen tim i bin go long Lombrum na ol i bungim em na salim em i go long Polis sel long Lorengau taun," Yapu i tok.
Ol polis i bin sasim em long em i bin ranawe long kalabus na em i wetim jasmen bilong em long kilim man i dai.
Ol sekyuriti i lukautim inap long em i kamap gen long kot.

Tripela yangpela mangi Barakau i lus long solwara

OL famili na ples lain bilong Barakau ples insait long Sentral Provins i wok long painim tripela yangpela mangi bilong ples bilong ol husat i lus long solwara long Sarere las wik.
Dispela tripela yangpela i bin go aut long solwara autsait tasol long ples bilong ol long resis long pulim ol pis wantaim ol narapela ples lain bilong ol.

Toktok i no klia yet long wanem namba 4 man i bin stap long moto bot wantaim ol tripela yangpela ol bin painim long Mande long wanpela ailan ausait tasol long Pot Mosbi.
Dispela man ol painim i stap long haus nau long kisim bek strong bilong em tasol ol narapela tripela ol ples lain i wok long painim yet.
Ol tok tu olsem moto

bot bilong ol sampela lain i painim apsait daun long Pot Mosbi bris, tasol dispela ol toktok bai kam aut klia long taim dispela man long haus bai orait.
Dispela tripela yangpela mangi i mekim olgeta ples lain long Barakau ples i stap long bikipela wari long wanem olgeta moto bot bilong ol i go aut long painim tripela long nait na de na nogat sain bilong ol tripela klostu 4-pela nait

na 5-pela de nau.
Ol famili bilong dispela tripela mangi i putim ripot pinis long ol shes na reskiu lain tu long painim ol.
Ol salim ol toksave tu go long ol Motuen kos lain long putim was sapos ol painim ol.
Wantok Niuspepa bai kisim gut stori long nem na krismas bilong ol tripela yangpela mangi na bai tokaut long wik i kam .

WNB Polis i holim pasim 4-pela lain

OL polis long We Nu Britein i holim pasim 4-pela lain husat i brukim lo.
Polis i holim pasim ol long reip, kilim man na braiberi na i lokim ol long Kimbe polis sel na ol i wet long sanap long kot.
Ol i bin holim pasim saspek, Ezekiel Bakadu, bikos em i bin kisim drag long Lae, Morobe, na i bin go long Kimbe na polis i bungim em long hap rot. Bakadu i laik traim

long givim mani, K1, 500, long polisman husat i holim pasim em, tasol wankain polisman i sasim em gen long braiberi.
Long Fraide, Epril 1, polis i bin holim pasim wanpela meda saspek long Blok 65, Kasia Viles, Hoskins. Polis I tok, saspek, Joe Paite, i gat 20 krismas, i bin kilim Beverlyn Onaku, husat i gat 20 krismas. Em i bilong Topinang Viles long Atonomas Rijon bilong Bogenvil.

Polis i go het na mekim wok painimaut long dispela hevi.
Long Sarere, Mas 13, tupela saspek bilong reip em ol i bin holim pasim long Ragona Viles, Kokopo. Polis i bin holim pasim tupela bihain long wanpela meri husat i gat 28 krismas i bin ripot long polis long 10-pela man i bin bungim em long hap rot na reipim em taim em i laik go long wok long moning.

Crisis Book on Sale

At Word Publishing Office—Dove Travels
AngauDrv, Boroko, NCD
Port Moresby

In a nutshell, BEHIND THE BLOCKADE gives a glimpse on the reality of life, the hardships and struggles endured by the people of Bougainville during the Crisis.

- For those who are interested you can purchase the Book which is going for K66.00 per copy .
- Sales in other centers will increase due to Air freight/ Postal charges.
- Books are on sale now in Buka atSnowy Varieties Shop opposite the main Buka Market.



For more Information kindly call Veronica on
Tel: 7273 9408 or email: vhatutasi@wantok.com.pg

Contact Immaculate in Buka on: 7179 1948 for more details.

Buk bilong Pikinini selebretim eniveseri

BUK bilong Pikinini i selebretim namba 8 eniverseri bilong en long las wik Fraide Epril 8 long Pot Mosbi.

Namba wan Buk bilong Pikinini (BbP) laibreri i bilong kamap long 8 Epril insait long Pot Mosbi Jeneral Haus sik eria klostu long TB na Malnutrisen na HIV/AIDS wod bilong ol Pikinini.

Long selebretim dispela de, BbP i mekim wanpela wokabut raun i go long haus sik long donetim moa long 1000 buk long ol wok bilong ol pikinini.

Bihain long dispela lukluk raun ol i holim wanpela spesel taim bilong tingim bek wok bilong Buk bilong Pikinini na tok tenkyu long ol Tisa-laibrerien husat i lainim planti tausen pikinini pinis long rit na rait. Pikinini i save long rit na rait bai helpim em long givim moa long wanem laip i stap raun long em na long kisim gutpel awok na lukautim laip bilong en.

Ol BbP laibreri long Pot Mosbi, Lae, Goroka, Alotau na Manus i laik tok tenkyu na mekim luksave long bikpela wok tru ol 40 Tisa-Laibrerien bilong ogensaisens.

Ol dispela Tisa-Laibrerien em; Miriam Ben, Veronica Peter, Janet Ken, Helen George, Agnes Kiname Taiyo, Stanley Jack, Rose Eunu,



Tisa-Laibrerien lainim pikinini long rit na rait na long kirapim laik bilong ritim buk taim ol i liklik yet. *Poto: Buk bilong Pikinini*

Elise Sobaba, Kevren Gop, Noreen Alo, Gus Petterson, Naomi Nakoko, Alex Gireway, Winifred John, Rhonda Michael, Joseph Poe, Noah Agino, Francesca Sam, Vagi Kariko, Goada Vagi, Hebou Gagoa, Marian Sanat, Rosemary Armban, Dorcas Lance, Aaron Wayne, Ruth Malum, Judith Tom, Betty Yohang, Pauline Nohowan, Janeth Kindaro, Christine Joshua, Liano Patma, Jenny Haro, Esther Gor, Rita Jack, Robynne Marai, Lisa Saking, Nara Keti, Tilua Doilegu na Harrietta Naime.

Buk bilong Pikinini (BbP) i bin kamapim 17 laibreri wantaim gutpela Literesi program bilong ol liklik pikinini long lainim rit na rait na insait long kantri bikos long helpim bilong ol sponsa na dona bilong PNG na Australia.

Ol ogenaísesen olsem Airways Hotel, Steamships, Express Freight Management, Seafast, Hastings Deering, BSP, Nasfund, Theodist, Nawae, Monier, Hebou na planti ol narapela olsem Australia Gavman i mekim na nau BbP i stap long 6-pela provins long helpim ol pikinini bilong ol setelmen na ol tarangu komyuniti.

Misin o as tingting bilong Buk bilong Pikinini em i mekim ol pikinini long laikim pasin bilong rit na lainim nupela samting, na kamapim gutpela tingting long ol

pikinini na kamapim moa pipel husat i save rit na rait insait long PNG.

BbP i save laik kamapim komyuniti awenes bilong wok bilong literesi. Em i gutpela long ol komyuniti i mas luksave na helpim ol pikinini insait long namba wan 5-pela yia taim ol i liklik yet long ol i lainim rit na rait.

BbP Faunda na Siaman Anne-Sophie Hermann i tok em i amamas tru long selebretim 8-pela yia eniveseri bilong Buk bilong Pikinini laibreri long Pot Mosbi Jeneral Haus sik.

"Mipela i amamas long sapotim wok bilong stretim tingting bilong ol pikinini wantaim spesel nid program bilong mipela. Tenkyu long gutpela bel bilong ol Tisa-Laibrerien husat i givim taim bilong ol long sapotim ol pikinini. Mi tok tenkyu tu long ol ol sapota na dona," Mis Hermann i tok.

BbP Eksekutiv Opisa, Lucinda Kisip i tok, "BbP i kam longpela rot, stat long 2007 taim em i bin stat wok. Dispela laibreri em i kirap long 2008 na nau em i op yet na i soim komitmen bilong BbP long helpim ol tarangu pikinini husat i save kam long dispela wok long Pot Mosbi Haus sik. Mipela i gat amamas long mekim ol pikinini i smail gen na amamas taim ol i kam insait long dispela laibreri."

Ol Bogenvil Memba sindaun long woksop

Ol memba bilong Bogenvil Palamen i bin sindaun long tripela de trening woksop long kisim moa save na klia long wok bilong ol.

Dispela trening woksop i bin kamap long Buka na i bin ran long Mas 30 na Epril 1.

Yunaitet Nesens Development Program (UNDP) i bin



Ol Bogenvil Palamen memba i sindaun long woksop. *Poto: UNDP Midia*

wok patna wantaim Bogenvil Ripresentativ haus long kamapim dispela woksop long helpim ol Bogenvil palamen memba na ol i ken karimaut gut wok bilong ol.

Dispela woksop i bin karamapim ol ki eria olsem wok bilong Palamen, operesen, wok bilong ol meri long lidasip na moa.

Ol memba i bin gat sans long Lainim long ol ekspiriens bilong ol Palamen memba na bikman bilong Australia, Nu Silan na Solomon Ailan.

Haus bilong Bogenvil Representativ i wanpela ki institusen long go hetim Bogenvil Pis Agrimen (BPA)

Olsem na ol memba we ol i makim ol long Bogenvil Palamen i gat bikpela wok long mekim disisen aninit long Atonomas Bogenvil

gavman (ABG).

Bikos ol i nupela memba, ol i mas kisim skul na save long ol wok long Palamen, ol rot long bihainim, ol samting i kamap nau long kantri na wol na ol i ken mekim ol gutpela disisen long ool ki gavanens samting.

Dispela woksop trening em i hap long UNDP i sapotim palamenteri wok insait long PNG long strongim demokresi, lo na oda na promoyim gutpela gavanens aninit long gutpela lidasip.

"UNDP i amamas long givim dispela sapot na mipela i bilip olsem dispela woksop long givim save bai helpim ol palamen memba long karimaut gut wok bilong ol long taim pipel bilong ol i laik lukim ol senis we ol i ken lukim

na kisim ol gutpela samting long en," Roy Trivedy em man i makim Yunaitet Nesens na UNDP long PNG i tok.

Francesca Semoso em Deputi Spika bilong Bogenvil Palamen i tok dispela namba wan woksop i kamapim as long ol palamen memba bilong ol long toktok na wokbung wantaim ol wanwok bilong ol long rijon, na tu, long kisim save gut long ol wok bilong ol olsem ol Palamen memba, na long givim sevan lidasip long ol wan wan konstituensi bilong ol.

"Ol sesen i bin gutpela tru long ol memba bilong mipela i lainim na kamap ol gutpela memba bilong Palamen na wok bilong ol," Mis Semoso i tok.

Ol lain bilong ol kantri long rijon husat i bin serim

ol ekspiriens bilong ol em,

- Mark Burton – pastaim memba na minista long Nu Silan Palamen;
 - Geoffrey Lee, memba bilong Nu Saut Wels Lejisletiv Asembli, Australia;
 - Freda Tuki, Minista bilong ol Meri, Yut, ol Pikinini na Famili Afeas long Solomon Ailan;
 - Leslie Gonye, Klak-Asisten, Tebol na Sajen-at-Arms, Lejisletiv Asembli, NSW Palamen, Australia;
 - Steven Reynolds, Deputi Klak, Lejisletiv Kaunsel, NSW Palamen, Australia, na
 - Deryck Fritz, Referendum Konsalten.
- Dispela woksop i hap long wok bilong UNDP long kamapim gutpela sindaun na bel isi pasin na i stap aninit long UN Pis Bilding Fan long go hetim Bogenvil Pis Agrimen.
- Long givim helpim aninit long wok patna wantaim ol arapela han bilong UN, UNDP i kontribut long bildim gutpela sindaun na demokretik gavanens em bikpeal samting long skruim ol wok go het long sait bilong gutpela wok developmen long Bogenvil na PNG.

CONDOLENCE MESSAGE



The Senior Pastor of Agape Interdenominational Ministry, Pastor Daniel Hewali, Pastor Ruth Hewali, Pastor Solomon Nenemi of Agape Oro Interdenominational Ministry, leaders and staff of Agape Oro Bible School would like to express heartfelt condolences to the family of:

**LATE PASTOR HENRY NEWTON YOYOEMBO
AGAPE INTERDENOMINATIONAL MINISTRY – POPONDETTA.
BORN: 18/08/53 DEATH: 06/04/16**

From Kotaure Village, Ioma sub district, Sohe District, Northern Province. Until his untimely passing on to Glory, Late Pastor Henry was the Principal of Asia Pacific International Harvest Ministry Training College at Popondetta training computer and SME skills. He was Assistant Pastor with Agape Interdenominational Ministry, assisting at the Oro Agape Bible School imparting skills with computing and business skills.

"Dear brother and Shephard and friend. You have left a vacuum in your ministry and we are at a loss as to who will fill in your shoes? But we thank God for your fellowship and friendship! What can we say? "The Lord gives and the Lord takes away, blessed be the name of Lord!" Job 1:21b

Pastor Henry Newton died at Popondetta General Hospital on Wednesday 6h April, after a short illness. He is survived by his one and only beloved daughter Shikinah and beloved grandson Adonai.



PNG gat planti samting long mekim marasin

KANTRI bilong yumi gat planti samting long mekim marasin na salim i go aut long narapela kantri na kisim moa mani.

Dispela em i toktok bilong wanpela sumatin long Yunivesiti ov Papua Niugini (UPNG) husat i greduet long famasi (pharmacy) las wik Fraide.

Dickson Hiru Olabe i tok PNG i gat kain kain diwai, flawas na arapela ol samting i stap long bus, graun na wara long hailans, nam-bis na maunten we dispela ol samting i ken kamapim marasin.

Bisnis bilong mekim risets na marasin em wanpela bikpela bilien dola bisnis indastri long sampela kantri olsem India, Saina, Ingran, Amerika na Japan.

“Long PNG, yumi i save ting olsem marasin em i samting bilong ol wait manmeri. Dispela em rong tingting mipela i save gat,” Mista Olabe i tok.

Em i tok wei bilong mekim marasin i no hat. Ol sumatin husat i bin stadi long famasi i save long mekim marasin.

“Mipela i save stadi long mekim marasin. Mi bin mekim wanpela bikpela projek long mekim marasin wantaim kepsikum.

“Wankain olsem tasol, sampela sumatin na save manmeri long marasin i save long mekim marasin.

“PNG i gat bikpela sans long mekim marasin bikos yumi gat kain kain plent na enimal long kantri bilong yumi,” Mista Olabe i tok.

Em i tok gavman i mas kirapim nupela lo na polisi long kamapim bikpela famasitikel indastri o bisnis long kantri na sapotim ol famasist long mekim marasin.

“Sapos gavman i putim moa mani na sapotim risets long kamapim marasin, PNG i ken kamapim planti kain kain marasin. Nogut yumi gat marasin bilong stopim o kilim dai sik AIDS i stap long bus, graun na wara bilong yumi,” Mista Olabe i tok.

Em i mekim dispela toktok taim Wantok Niuspepa i bin askim em long autim sampela tinging bilong em long mekim marasin long kantri.

Mista Olabe i tok teknoloji bilong mekim marasin em i no hat. Tasol gavman i mas sapotim risets na sains.



Mista Olabe i tok kain samting olsem kepsikum, onion, kawar, muli, lemon na arapela gaden kaikai bilong PNG i ken mekim marasin.

Em yet i bin yusim kepsikum long mekim marasin na dispela i bin kamap olsem bikpela risets projek bilong em taim em i bin mekim fainel yia long yunivesiti.

Wantim dispela ekprens bilong em, Mista Olabe i tok em i laik i go insait long bisnis bilong mekim marasin.

Dispela em i wanpela bikpela bilien dola bisnis. Em i laikim PNG gavman long sapotim em long dispela bikpela projek we em i tingting long kirapim long kantri.

Mista Olabe i nau wok wantaim Nesenel Diptamen ov Helt na em i mekim residensi bilong em long Pot Mosbi.

Em i bin stap 5 yias long UPNG Medikel Fakalti na pinisim digri long famasi. Insait long dispela 5-pela yia, Mista Olabe i bin stap presiden bilong Hela na Sauten Hailans Medikel Studen Asosiesen.

Ol sumatin yet i bin les long makim nupela man i kamap lida bilong ol na ol i makim em i kamap sumatin lida inap 5-pela yia olgeta.

Taim em i bin mekim fainel yia, em i bin stap olsem spesol projek kodineta bilong SRC. Ino dispela tasol, em i bin holim planti lidasip wok taim em i stap long hai skul.

Em i bin stap sumatin lida Hela na Sauten Hailans sumatin long Kabiufa Adventis Sekondari Skul long Goroka taim em i bin mekim gret 11 na 12.

Bihain long dispela em i bin kam mekim fes yia long Pasifik Adventis Yunivesiti (PAU). Bihain long wanpela yia, em i bin go skul long UPNG Medikel Fekalti.

Mista Olabe em i mangi Pii-Nagia viles insait long Tagali LLG, Tari-Pori distrik, Hela Provins.

1. Dickson wantaim tupela brata bilong em, Patrick (lephan) na Nomisen.
2. Dickson i wokabaut long go kisim digri pepa bilong em.
3. Narapela kandre bilong Dickson, em Joel i kisim digri pepa bilong em tu.



Winim Daiabitis

Helt toktok i kam long Pot Mosbi Jeneral Haus Sik WOL Helt Ogenaisesen toktok long sik daiabitis long makim Wol Helt De Epril 7 2016 bon de bilong en.

Olgeta yia WHO i save makim wanpela bikpela tingting long kamapim gutpela helt, long ol pipel. Dispela yia 2016 em toktok long daiabitis, wanpela sik we i no save kamap long binatang we i save kalap long wanpela man na i go long narapela tasol em i save senisim laip bilong planti pipel long wol, long ol kantri we i no save gat bikpela mani tumas.

Dispela sik we i no save pinis taim em i kisim wanpela man o meri. Em i sik suka we i save soim bikpela mak bilong suka insait long blut na taim em i go bikpela tru, em i save bagarapim lewa, ol rot bilong blut i ron i go long lewa na i go long ol narapela hap bilong bodi.

Diabitis em i wanem kain sik?

Bodi bilong yumi save nidim sampela skel bilong glukos o suka insait long blut bilong yumi. Glukos em i as bilong kisim strong long wok na ran o wokabaut raun na em i stap insait long ol blut bilong yumi. Glukos i save kamap long ol strongpela kaikai yumi save kaikai olsem bret, pasta, rais, seril, prut, milk na yogat. Ol i kolim kabohaidret. Bodi save brukim ol kabohaidret i go daun kamap glukos taim em i go insait long blut long bodi. Taim yumi kaikai ol dispela kain kaikai wanpela samting ol i kolim long insulin i save kamap na go insait long blut bilong yumi na i save helpim glukos long ol kaikai i go insait long ol bodi sel bilong yumi na givim strong long bodi.

Namba wan kain daiabitis i save kamap taim hap bilong bel i no moa save kamapim insulin bikos banis bilong bodi i bagarapim. Namba tu kain daiabitis em i save kamap na i go bikpela long taim dispela hap bilong bel i no inap long kamapim insulin na i no mekim wok gut long helpim bodi.

Ol hevi kamap long Daiabitis (WHO) – Daiabitis inap long bagarapim lewa, ai, kitni na ol sistem bilong bodi. Daiabitis i save opim rot long kisim hat atek o hap indai. Taim blut i no ran gut tumas, ol rop bilong bodi i bagarap long ol lek na i mekim isi long ol sua i kamap aninit long lek na sampela taim bai ol i ken katim lek tu. Sik daiabitis i save kamapim ai pas

Gestetesenal Daiabitis – Gestesenal daiabitis melitus (GDM) em i dispela kain daiabitis we inap kamap long ol meri gat bel. Ol lain i ken lukautim gut bodi bilong ol taim ol i kaikai gut na wokim planti wok o ekseais, tasol sampela meri husat i kisim gestesenal daiabitis, i mas kisim insulin sut long taim ol i gat bel inap long taim ol i karim bebi. Ol dispela meri i stap long birua long taim bilong karim bebi, ol inap karim bebi dai pinis long bel, o lusim bebi pastaim long em i bon.

Pri-daiabitis – Dispela em i taim we glukos insait long blut i go antap abrusim mak tasol i no go inap long mak bilong kisim namba 2 kain daiabitis. Hat long kontrolim glukos (IGT) em glukos blut level i go antap tasol i no inap long kisim namba 2 kain daiabitis. Birua em i stap long taim man o meri i kisim bikpela weit tumas olsem long namel bilong bodi, i no save wok o pilai tumas. Ol dispela i save gat sik long kiau bilong bebi o ol lain i kam long kain ples olsem long Pasifik Ailan, Esia na ol hap bilong India.

Sain bilong sik daiabitis -

Sampela kain sik bilong daiabitis i save gat senis long bodi olsem: pilim pispis klostu, klostu, Nek i drai tumas, skin i go pat hariap o go bun hariap nating, pilim hangre, pilim han na lek i dai, pilim skin i les tumas, na no gat amamas long nois nabaut na mekim wok, ol sua i no save pinis hariap, skin skrap na kain kain sua long skin, ai i no lukluk kliia na kros nating, lek i tait, het i pen, pilim ai raun.

Ol wei bilong lukautim lain i gat daiabities- kisim insulin sut o insulin pam, was long glukos (suka) long blut, mekim ol ekseais na wok strong, kisim gut marasin bihainim stret wanem nes na dokta i tok, lukautim gut weit na i no ken go pat tumas o bun tumas, kaikai gutpela kaikai i gat kumu na prut na abus wantaim, stop long smok na lukim ol dokta bilong yu na taim yu no pilim orait.

Wok painaimaut long Westen Hailans Helt Atoriti

“Long Epril 11, Presiden bilong Nesenel Dokta Asosiesen na Nes Asosiesen i bungim maus wantaim me na putim aut wanpela bung toktok long wanem samting i wok long kamap nau long Komite bilong wok painimaut long wok bilong Westen Hailans Provinsal Helt Atoriti,” Mista Kase i tok.

Dispela stetmen i tok olsem:

Mipela, olsem mi yet Pascoe Kase, Seketeri bilong Dipatmen bilong Helt, makim Minista bilong Helt HIV/AIDS, Michael Malabag, Mista James Naipao, Presiden bilong Nesenel Dokta Asosiesen na Steven Nawik, Presiden bilong ol Nes Asosiesen, bungim wari bilong mipela long Westen Hailans Provinsal Helt Atoriti i mas kam bung wantaim na

larim ol helt sevis long Westen Hailans bai go bek gen olsem pastaim long helpim ol pipel bilong Westen Hailans.

Long sampela mun i go pinis, i bin gat sampela kros i kamap namel long sampela wokman na wokmeri na menesmen bilong Westen Hailans Provinsal Helt Atoriti. Dispela i bin kamapim wanpela pablik kibung long toktok long ol dispela hevi, na ol wokman na wokmeri i no amamas na ol i tok ol bai kisim wanpela stop wok na ol narapela kain pasin bilong kisim ai bilong gavman na ol pablik.

Taim Palamen i bin mekim gutpela disisen long 2007 long kamapim Provinsal Helt Atoriti Ekt, em i bin tingting na redi long sampela taim bihain bai gat nid long stretim edministresen na wok bilong ol helt sevis wok we provin-

sal govman helt atoriti bai mekim.

Palamen i givim pawa i go long Minista husat i gat wok long dispela long wokim Investigesen long taim i gat nid. Minista Michael Malabag nau i bihainim dispela lo na yusim pawa bilong em long makim komiti bilong mekim wok painim aut long hevi bilong Westen Hailans Provinsal Helt Atoriti. Indipenden Komite long wokim investigesen, wantaim lidasip bilong wanpela loiya bilong Opis bilong Stet Solisita, nau i stat wok pinis long Maun Hagen long mekim dispela wok painim aut.

Dispela em i stretpela rot bilong sekim ol wanem kain toktok i kamap, kros o bel hevi bilong ol wokman na wokmeri wantaim menesmen long Westen Hailans Provinsal Hailans Helt

Atoriti we ol i bin tokaut long em pinis.

Helt sistem bilong yumi em i laki long komitmen na bel kirap bilong ol strongpela wokman na wokmeri bilong en we sampela bilong ol i save mekim planti wok antap long wok bilong ol yet. Mipela gat ol nes, dokta, komyuniti helt woka na planti narapela husat i save was long ol sikman na meri long haus sik we planti taim ol i no save kisim gutpela malolo na ol i save kisim bagarap long bodi.

Mipela i laki tu long gat ol bisnis haus, sios na ol meri lida husat i stap sambai long stap insait long ol pablik haus sik bod, na ol provisal helt atoriti wantaim liklik pei tasol na sampela taim i save bagarapim bisnis na wok bilong ol tu bikos ol i givim moa taim long wok bilong

helt sevis na lusim tingting long wok bilong ol yet.

Taim i no gat wanbel tingting i kamap, em i isi long olgeta lain husat i stap insait long helt sevis long abrusim mak bilong wok na mekim ol pasin we i no inap helpim olgeta pipel bilong PNG na PNG Helt Sistem o long laik bilong ol dispela lain yet.

Mipela i bungim maus na singaut long olgeta lain i gat bel hevi long ol i mas traim long kisim wanbel tingting, na stretim wok olsem ol bikpela manmeri i gat gutpela tingting.

Mipela askim olgeta long wok bung wantaim indipenden komiti nau i stap long Maun Hagen.

Komite bai bihain go long Pot Mosbi long mekim ol ripot bilong ol. Em i mas mekim ripot long ol dispela wok painimaut i go long Minista na NEC.

Kerema Haus sik I gat nupela TB Wod

Jacob Marcos i raitim

WANPELA nupela na gutpela kain wod bilong Tubekulosis (TB) long Kerema Jeneral Haus sik em i op pinis long las mun long makim Wol TB de, na Gavana bilong Galp Provins Havila Kavo yet i bin stap long opim dispela wod.

Dispela TB wod i gat 18 rum we ol lain sikman na sikmeri husat i gat multi-risisten TB bai stap long en. Em i gat wanpela konsaltesen rum na ples bilong ol visita i ken kam long lukim ol wantok o famili bilong ol husat i stap long wod.

Medicine San Frontiers (MSF) Ol dokta i no gat mak, na Galp Provinsal Edministresen aninit long Provinsal Helt Divisen ol i bin tromoi K1.2milien long wokim dispela wod.

Kerema Jeneral Haus sik em i namba



OTSY TB Mascot wantaim ol Nes bilong Kerema Haus sik

tu provinsal haus sik long kantri long kisim wanpela kain wod olsem, bihain long Daru Jeneral Haus sik long Westen Provins.

Deputi Seketeri bilong Helt, Dokta Paison Dakulala husat i bin stap long taim bilong opim wod i tok olsem Nesenel Dipatmen bilong Helt i laik sapotim pait bilong rausim sik TB long provins olsem na ol i helpim wantaim

teknikal asistens.

Em i tok Galp provins em i wanpela hatpela ples long sait bilong rot na transpot na em i hat tru long bringim gutpela sevis. Olsem na dispela kain patnasip namel long MSF na Galp Provinsal Edministrresen em i rot tru bilong daunim dispela sik long provins.

Em i tok Nesenel Gavman bai helpim yet Provinsal Helt Sistem, tasol em i tok

strong long ol Provinsal Gavaman long ol tu i mas sapotim fanding.

Em i tok amamas long patnasip namel long MSF na Provinsal Edministresen.

Long wankain taim, Gavana Havila Kavo i singaut long ol bikpela kampani husat nau i wok insait long provins long ol i mas stat long putim han na helpim gavman long stetim helt

sindaun bilong ol pipel.

“Yupela ol kampani we i wok insait long Galp Provins long planti yia pinis, nau em i taim bilong yupela long sapotim ol pipel. Mi singaut long ol kampani olsem Total SA, Oil Search, Exxon Mobile, RH na ol narapela long stat patna wantaim gavman.

“Sapos yu no laik sapotim dispela wok, em bai yu no inap kisim sapot bilong Gavana bilong Galp.

Gavana i tok patnasip na opim bilong wod i opim rot bilong bikpela moa samting bai kam insait long provins.

“Ol i save tok Kerema yu no save, yu yet kam na lukim. Wanem samting yu lukim tude em i samting bilong asde yu lukim tude bikos tumora bai yu lukim Kerema long dispela kain wei,” em i tok.

Tripela meri kendidet long resis long UN Seketeri Jenerel wok

LONG tude, ol meri i wok long kamap strong na kisim ples bilong ol long wol.

Yunaitet Nesens (UN) em i bikpela ogenaisesen long wol we long ol yia i kami nap nau, ol man tasol i save go pas long en.

Nau posisen long Jenerel Seketeri o hetman bilong UN i op long ol manmeri i aplai we ol bikman bai glasim na skelim na makim wanpela long ol.

Long 8-pela lain kendidet i aplai long dispela bikpel;a posisen,

tripela em ol meri.

Wanpela em pastaim Praim Minista bilong Nu Silan, Helen Clark na narapela yupela bikmeri, wanpela eks presiden, na ol arapela eks foren minista long ol kantri long wol.

Ileksen bai kamap sampela taim long dispela yia inap lukim fes jenerel seketeri i kam long Isten Yurop na tu, namba wan meri long dispela top wok.

Hia em liklik bekgraun stori bilong ol kendidet na moa yet, long ol meri.



Irina Bokova

Irina Bokova em i bos bilong UN Kalserele Ejensi, UNESCO, stat yet long yia 2009. Em i bin wok wantaim Foren Minista long kantri Bulgaria long Westen Yurop long 1996-1997 na tu, em i bin am-basada bilong kantri long

Frans na Monaco.

Ol i lukim Irina husat i gat 63 krismas olsem wanpela strongpela kendidet bilong Isten Yurop. Papa bilong em i bin Edita bilong Bulgaria komunis pati niuspepa long taim Rasia i bin strongpela komunis kantri.

Sampela meknais i bin kamap long mekim Palestsaiun i kamap memba bilong UNESCO long 2011 na US i katim fanding bilong em long UNESCO.

Mis Bokova i gat save long Tok Inglis, Frans, Rasia na Spain.

Stori na Wok wantaim Elizabeth Cox

Skrumi i kam long las wik.

Kamapim Kaikai Bilong Yumi Yet **Toksave:** Yumi olgeta mas klia olsem em i nambawan tru sapos yumi inap long painim na kaikaim kaikai bilong yumi yet.

Gaden kaikai bilong yumi i klin na i nupela. Nupela kaikai bilong gaden i winim kaikai ol i katim na karim long rot na putim long san long maket. Nupela kaikai i winim olgeta ol tin kaikai ol ais kaikai (long "freezer") bilong stua.

Sapos yu kamapim kaikai bilong yu yet, yu inap long planim stret ol kain kaikai yu yet yu amamas long kaikai na hamas long dispela kaikai yu mas kisim.

Sapos yu kamapim kaikai bilong yu yet bai yu painim gutpela nutrisen kaikai, na tu bai yu sevim mani bilong yu. Sapos yu planim kaikai na salim gen long baim kaikai bilong stua, bai yu lus tru. Ol rais, bisket na suga bilong stua ol i no gutpela kaikai bilong bodi bilong yumi. Ol i no gutpela "Senis" bilong gaden kaikai, na ol i bikpela mani tumas.

Ol Meri Inap Long Mekim Wanem?

Yumi mas traime na mekim ol-

geta manmeri i klia long gutpela as bilong planim kaikai bilong yumi yet.

Ol mama i mas klia tru olsem gaden kaikai i gat moa nutrisen na i no westim mani. Husat papamama inap long kamapim inap gutpela kain kain kaikai bilong famili ol i nambawan lain stret.

Planti meri ol i mangalim stua kaikai bikos em i "isi we" bilong les man. Sampela ol i ting olsem i smat long kaikai olsem waitman. Sampela ol i harim ol gris stori na singsing long ol rabis kaikai ol i save wokim long ol buk nabaut na radio.

Yumi mas kliaim tingting bilong ol na soim ol olsem i no gutpela long givim beksait long wok bilong kamapim kaikai bilong famili. Na tu i no gutpela long kamapim ol naispela bin, kumu na frut long gaden na salim gen long mani bilong baim bisket na loliwara.

Em i asua tru.

Yumi mas helpim tingting bilong papamama long tingting strong long olgeta taim ol planim kain kain gutpela kaikai long gaden we famili i ken kisim gut kaikai na kamap strong.



Helen Clark

Pastaim Praim Minista bilong Nu Silan, Helen Clark i bin go pas long UN Developmen Programstat yet long 2009.

Dispela i mekim Mis Clark i holim top posisen stret we wanpela meri i holim long UN.

Mis Clark i gat 66 krismas i wanpela pastaim akademik, i gat rekot long Nu Silan olsem wanpela i bin stap praim min-

ister long longpela taim we i bin holim wok olsem praim minister long tripela tem, stat long yia 1999 inap long yia 2008.

Mis Gherman i gat 47 krismas i bilong kantri Moldova na i bin pastaim Foren Minista i bin go pas long ol negosiesen wantaim Yuropien Yunien (EU) na putim kantri bilong em i go insait olsem asosiet memba.

Em i bin holim dispela wok long 2013 inap long mun Janueri dispela yia.

Em i bin wok olsem embasada bilong Moldova i go long Austria, na Sweden, Norway na Finlen.

Mis Gherman em i pikinini bilong namba

wan presiden bilong Moldova, Mircea Snegur naem i save long tok Inglis, Rasia na Gemani.

Ol man kendidet em **Antonio Guterres** i gat 66 krismas bilong kantri Spein em i pastaim UN Hai Komisiuna bilong ol Refujis (UNHCR) long 10-pela yia, inap long las yia, 2015.

Em i wanpela strongpela kendidet long UN JS posisen bikos em i bin mekim gut wok bilong en, maski wok em i mekim long UN i gat bikpela salens.

Em i bin Praim Minista bilong Portugal long yia 1995 inap long 2002.

Mista Guterres i bin wanpela enjinia na em i save toktok long Tok Inglis, Frans, na Spenis.



Natalia Gheman

Ol mamas i wokim samting long helpim ol yet: Gohozuho Wimens Asosiesen

"MI no save baim eksiom o ol narapela marasin long wasim ol plet long stua stsat yet long taim Isten Hailans Famili Vois (EHFV) i skulim mipela long mekim ol dispela samting," Aye Gane i tok.

Misis Gane em i rijista memba wantaim Gohozuho Wimens Asosiesen long Ifiufa/Mimanalo LLG long Goroka Distrik, Isten Hailans provins.

Em i gat gutpela as long lap bihaiun long em i pinisim gut wanpela wik treni9ng kos we EHFV i bin ranim.

"Dispela Laip Skil treniing i dispelisim stret laip bilong mi. Mi ken samap, beik na kukim ol kain stail kaikai. Nau mi



Ol mama Gohozuho i sindaun na harim long taim bilong woksop. Poto SPSN Midia

yusim ol samtign mi lainim long kisim mani long en na kamapim gut laip bilong mi na famili. Man bilong mi i amamas long mi tu," Misis Gane i tok.

Em i ken mekim tu ol swit Irian Jaya biskit nsa

kaukau biskit, na ol basket long salim long maket, na em i amamas tru.

EHFV em i ki patna bilong Strongim Pipol Strongim Nesen (SPSN) Program we gavman bilong Australia i fanim.

PNG POWER Ltd		RAMU 1: LOAD SHEDDING SCHEDULE
EFFECTIVE AS FROM SATURDAY 16/04/16		
CENTRE	LOCATION AREA DETAILS	TIME
LAE	MMJV	2am - 12am
	East/West Taraka, Igam, PTC	10am - 11am, 7pm - 8pm
	Uni Admin, Kamkumu, Lae Tech, Butibum	1pm - 2pm
	Bundi Camp, Police Brks, Huon Road	9am - 10am, 9pm - 10pm
	Market, Ela Motors, Hella Cement, SP Bank	11am - 12pm
	Air Corps Rd, Shell, SP Brewery, Stadiuim	9am - 10am
	Abel Tasman St, Milford Road, Main Wharf	9pm - 10pm
	Top Town, Telikom, Huon Road, China Town	7pm - 8pm
	Highway, Morobe Ave, Papua Compound	8am - 9am, 8pm - 9pm
	Sangalau, RD Cannery, Nagada, N/Coast	8am - 9am, 2pm - 3pm
MADANG	Jomba/ Newtown/Yagaum, Jant Timber, A/Port	9am - 10am, 12pm - 1pm, 7pm - 8pm
	Hospital Residences, Smugglers Inn	6pm - 7pm
GOROKA	Town, Madang Hotel, Coast Watchers	10am - 11am, 8pm - 9pm
	Town, Goroka North, Kabiufa	10am - 11am
Mt.HGN	Teachers College	11am - 12pm, 9pm - 10pm
	Town Area, Hospital, PNG WB	8am - 9am
	H/Ldr Hotel, Tomba, Wabag Town, Wapenamanda	9am - 10am, 9pm - 10pm
	Airport, Kagamuga, Kuli Gab, Avi	11am - 12pm, 7pm - 8pm
CONTINUE TO SUNDAY 17/04/16		
LAE	MMJV	1am - 12am
	PNGWB, Uni.Tech.	10am - 11am
	East/West Taraka, Igam, PTC	6pm - 7pm
	Uni Residence, Buimo Road, Eniku	9am - 10am, 8pm - 9pm
	Uni Admin, Kamkumu, Lae Tech, Butibum	8am - 9am, 4pm - 5pm
	Bundi Camp, Police Brks, Huon Road	12pm - 1pm, 6pm - 7pm
	Nadzap, Leron, Mutzing	1pm - 2pm
	Market, Ela Motors, Hella Cement, SP Bank	10am - 11am, 5pm - 6pm
	Air Corps Rd, Shell, SP Brewery, Stadiuim	7am - 8am, 2pm - 3pm, 8pm - 9pm
	Abel Tasman St, Milford Road, Main Wharf	11am - 12pm, 6pm - 7pm
MADANG	Top Town, Telikom, Huon Road, China Town	1pm - 2pm, 9pm - 10pm
	Highway, Morobe Ave, Papua Compound	7am - 8am, 3pm - 4pm
	Sangalau, RD Cannery, Nagada, N/Coast	6am - 7am, 2pm - 3pm
	Jomba/ Newtown/Yagaum, Jant Timber, A/Port	11am - 12pm, 6pm - 7pm
	Hospital Residences, Smugglers Inn	9am - 10am, 7pm - 8pm
	Madang Tech, DWU, Maritime	7am - 8am, 4pm - 5pm
	Town, Madang Hotel, Coast Watchers	12pm - 1pm, 5pm - 6pm
	Town, Factory, Papindo Village	4pm - 5pm
	Teachers College	11am - 12pm, 6pm - 7pm
	H/Ldr Hotel, Tomba, Wabag Town, Wapenamanda	6pm - 7pm
Mt.HGN	Airport, Kagamuga, Kuli Gab, Avi	9am - 10am, 6pm - 7pm

Ol bisop i wari long helt na edukesen

OL KATOLIK bisop bilong PNG na Solomon Ailan (SI) i wari long Sios Helt Sevis na Edukesen long kantri na ol i toktok long ol dispela tupela samting long Anuel Jenerel Miting (AGM) bilong ol.


Jenerel Seketeri bilong Konprens bilong ol Katolik Bisop long PNG na SI, Pater Victor Roche SVD i tok samting olsem 22 bisop bilong PNG na SI i bung long tupela wik AGM bilong ol long Vanimo, Sandaun Provins. Dispela bung bai pinis long tumora Fraide, Epril 15.

Em i tok ol i glasim na skelim ol samting i karamapim spirituel, sosel, morel o pasin long wokim ol stretpela pasin long ol pipel insait long tupela kantri.

Het tok bilong dispela AGM em, "Serim Gutnius bilong Marimari." Ol bisop i wokim wanpela Pastorel Pas long dispela het tok.

Pater Victor i tok Helt na Edukesen em ol bikpela sevis eria long dispela kantri we ol sios i lukautim na ol Katolik bisop i wari olsem no gat gutpela toktok wantaim i save kamap namel long gavman na ol sios long sait bilong ol edukesen polisi na tu, tusen fri fi (TFF) i no go gut.

Ol bisop i wari tru long sios helt sevis na pasin we nesanel gavman i wokim long katim K51 milien long baset bilong dispela yia na dispela bai kamapim hevi nau long sait bilong ol woklain, pe bilong ol woklain, saplai bilong ol



Ol Katolik Bisop bilong PNG na Solomon Ailan i bung nau long Vanimo, Sandaun provins. Foto: Pater Victor Roche SVD

57th Annual General Meeting
4th - 15th April, 2016
Vanimo, Sandaun Province

Ol bisop i tok Katolik Helt Sevis em i baksait bun long ol pipel insait long ol ruel eria we i sevim 30 pesen long ol helt sevis insait long dispela kantri.

Tasol ol i tok gavman i katim K51 milien long baset bilong dispela yia na dispela bai kamapim hevi nau long sait bilong ol woklain, pe bilong ol woklain, saplai bilong ol

marasin, helt sevis na moa.

Olsem na ol bisop i wokim stemen long Helt na Edukesen.

Pater Victor i tok tu olsem ol bisop i toktok long 2017 Nesanel lleksen na ol i kamap wantaim wanpela Pastorel Pas long "Kristen Bilip na lleksen."

Em i tok tu olsem ol bisop i bin gat sans long go long Jayapura

long Indonesia na ol 22 bisop i bin bung wantaim 4-pela long ol 5-pela Katolik bisop bilong Wes Papua.

Ol i bin toktok long ol rot we ol i ken bung wantaim namel long ol daiosis long Wes Papua na PNG na SI.

Ol bisop i bin toktok long sait bilong ol Wes Papua refuji na kraik long indipendens bilong ol Wes

Papua pipel.

Pater Victor i tok ol bisop bai wokim wanpela stemen long dispela samting tu long pinis bilong AGM.

Ol pipel bilong Vanimo bai givim bikpela gutbai long olgeta bisop insait long wanpela seremoni ol bai kamapim long Don Bosco Haia Sekendri skul tude.

Ol nupela eksekutiv bilong ELCPNG, kisim blesing

Paulus Tali i raitim

Long Sande Mas 13, moa long 2,500 Luteran kristen i kam olsem long Simbu, Hagen Distrik, Madang, Goroka, Kainantu

Karkar distrik, ol mausman na meri na ol lain bilong nupela Asiten Bisop Reveren Lucas Kedabang, na ol Wantoat tu i kamap long witnesim instelesen bilong ol tripela nupela lida bilong ELCPNG sios. Ol i bin makim tripela long namba 30 sinod, long Finshafen, Kote distrik.

Ol tripela nupela sios lidas husat i kisim blesing em nupela Het Bisop Reveren Jack Uraime, Asiten Bisop, Lucas Kedabang na nupela Jenerel Seketeri, Bernard Kaisom.

Bisop bilong Luteran sios long Australia, Rev-

eren John Henderson i bin givim blesing long ol. Asiten bilong em Dean Reveren Andreas Maar bilong Evanjelikal Luteran sio long Bavaria, Jemani tu helpim long putim han antap long 3-pela nupela lida.

Reveren Zau Rapa, husat makim Reveren Giegere Wenge i toktok long dispela bung. Em i tok long dispela program mipela makim sios, na ai bilong ol Luteran na em i givim ki bilong opis i go long yu nupela Bisop Reveren Jack Uraime, na nupela namba tu Bisop Lucas Kedabang na nupela Jenerel Seketeri Benard Kaisom.

Long taim Bisop, Zau Rapa i givim ki, long baksait ol Kristen bin amamas na singaut trupela man, nau taim bilong lukim nupela lida wantaim senis long sios.

Reveren Zau Rapa, tok

moa olsem em i sevim 10-pela yia long sios het na sampela wok ministri em bin kamapim, na em i amamas long ol senis i kamap.

Olpela seketeri Albert Tokave, tu i bin witnesim dispela bung na em i tok, wok bilong sios em i no isi wok na em wok wantaim olpela Bisop Sir Zurewe Zurenuoc i kam inap Bisop Rev Giegere Wenge.

'Nau mi lusim wok i go long nupela wanwok Bernard Kaisom, sios wok em bilong yumi olgeta na mi amamas nupela lida nau kisim wok,' Mista Tokave i tok.

Ol ovasis visita Bavaria, Australia, Amerika, Wes Papua, Not Jemani, na Katolik sios Bisop, tu kamap long witnesim dispela seremoni. Bisop John Henderson, bilong Luteran Sios long Australia i bin stap tu.

Stia bilong laik pasin, seks na marit long ol Katolik

POP Francis i autim nupela dokumen o stiabuk bilong Katolik Sios long laik pasin (lav), seks na marit.

Dokumen ya i gat 260 pes i gat ol skul bilong

sios we ol i skelim na glasim gen long ol Katolik manmeri long bihainim.

Pop Francis i tok yumi mas mekim gutpela pasin long ol "gay"

lain, tasol long wankain taim, em i tok "I no gat we" long tok olsem em i stret long glasim "gay" marit wantaim marit namel long man na meri.

Em i singaut tu long

sios long no ken strik tumas, tasol soim pasin sori long ol Katolik husat i wokim asua olsem ol dispela i brukim marit na ol i marit gen.

Yangpela bilong tude mas senis

Paulus Tali i raitim

LONG tripela wik i go pinis, Ista kem bilong ol yangpela bilong Buang long kantri i bin kamap long Biangkung peris, Morobe Provins.

Dispela em i namba 29 Ista yut kem bilong ol Luteran yut long kantri.

Mambu kongrigesen i go pas long lukautim kem we i lukim moa long 1, 500 kristen yut bilong Buang i kam long Mosbi, Madang, Bulolo, Wau, Lae, Makam Haiwe, Potsie na Mumeng. Buang Hagen wantaim Goroka Buang i no bin kamap. Wewak yut i bin kamap wantaim ol papa na mama, na ol i

winim ol arapela distrik na seket long Morobe provins.

Kem i save bungim ol yangpela long kamapim luksave bilong ol long Kristen laip wantaim bikpela Jisas.

Dokta Kemung Ziracukic i bin go pas long stadi program wantaim Pasto Sakaria Melkadi, em Pasto bilong St Andrew Peris long Lae i helpim em.

Dokta Kemung i tok taim ol yangpela insait long komyuniti na famili i senis na lukim Tok bilong God, dispela inap long bringim nupela Kristen wokabout insait long famili na komyuniti, na senis long kongrigesen, peris na distrik.



Redi long lotu bilong opim yut kem. Foto: Paulus Tali

Bikpela populesen tasol i no gat inap dokta


PNG i nidim moa dokta. Populesen bilong kantri i wok long go hariap tru. Sampela i tok populesen i winim mak bilong 7 milien na i wok long go antap moa long wan wan yia. Em i bikpela namba tru na i gat luksave pinis olsem ol impoten sevis olsem kwaliti helt sevis na edukesen i sot. I no gat inap dokta long lukautim ol sikmanmeri.

I no gat inap dokta long wok long ol haus sik na helt senta bilong gavman na ol sios. Moa long hap namba bilong helt sevis em ol sios i save lukautim.

Long dispela wik, i gat ol toktok i kamap gen long Helt Dipatmen i tingting long kisim ol ovasis dokta i kam wok long ol haus sik bilong yumi. Dipatmen i luksave olsem kantri i sot tru olsem na ol i mas lukluk long ol arapela kantri long kisim moa dokta.

PNG i gat wanpela skul tasol bilong givim trening long ol dokta. Dispela skul, UPNG Medical Faculty i han bilong Yunivesiti bilong PNG. Ol i gat lo bilong ol yet long kisim ol kwaliti studen na givim kwaliti trening long ol long kamap dokta. Ol i mas skul planti yia moa na winim gut mak pastaim na ol i ken kamap dokta. Olsem na i no gat planti manmeri i save greduet long kamap dokta, ating samting olsem 40 o 50 tasol.

Sapos PNG i laik lukim moa dokta, orait i mas gat moa mani



Jada 016

long kamapim wanpela o tupela moa skul bilong lainim ol studen. Skul bilong kamap doka i nidim ol gutpela tisa, ol ikwipmen, haus slip, ol klasrum na planti arapela samting moa. Na olgeta yia i mas gat gutpela baset bilong sapotim dispela skul long wok bilong en. Mani na ol gutpela tisa wantaim stretpela edministresen bilong skul, bai inap long lukim moa dokta i kamap long sevim ol pipel bilong kantri.

Olgeta dispela samting i go bek

gen long han bilong gavman. Sapos gavman i laik sevim tru ol pipel bilong kantri, orait lukluk long ol arapela rot bilong kamapim moa dokta long lukautim ol sikmanmeri. Wanpela skul tasol bilong givim trening long kamap dokta, em i no inap.

Ol lain i makim Kristen Helt Sevis (CHS) i kam bung long Mosbi long dispela wik long kibung bilong ol. Ol tu i gat planti askim long dispela bung bilong ol. Wanpela askim bilong ol em long

kisim ol dokta. Ol i tok planti haus sik na helt senta bilong ol sios insait long kantri i sot tru long ol dokta. Ol i traim long kisim ol dokta tasol i no gat gutpela bekim long askim bilong ol. Planti ol dispela helt senta i stap long ol ruel eria olsem na i no isi long kisim ol dokta i go wok.

Ol sios helt sevis i wok long kisim taim tu bikos nesanel gavman i katim baset bilong ol. Long 2014 na 2015 baset, gavman i givim givim gut mani i go long ol.

Tasol long dispela yia, gavman i katim mani olsem na planti bilong ol i kisim taim nau. Helt Seketeri i tokim dispela kibung bilong ol CHS olsem gavman i luksave long hevi dispela disisen i kamapim na bai i lukluk gen long ol rot bilong helpim ol.

Long taim gavman i tokaut long katim baset bilong sios helt sevis, planti ol pipel i bin egensim dispela disisen, bikos ol i luksave long bikpela sevis ol sios helt senta na haus sik i save givim long ol pipel. Long planti provins, i no gat etpos o klinik bilong gavman olsem na moa pipel i save kisim helpim long helt senta bilong sios.

Helt sevis em i wanpela bikpela sevis gavman i mas givim long ol pipel. Na we i gat narapela patna olsem ol sios i helpim em, orait gavman i mas givim stret mani inap long helpim ol long givim dispela sevis long ol pipel. Ol i gat baset bilong wok long wan wan yia, tasol sapos ol i no kisim mani inap long mekim ol dispela wok, bai ol i no inap wok. Na sapos ol sios helt sevis i pas, bai ol pipel i kisim taim stret.

Bikpela populesen bilong PNG i stap long ol ples longwe long taun na i no gat narapela rot long kisim helpim long taim ol i sik.

Yumi skelim na wetim gavman long helpim gen sios helt sevis insait long kantri.

Atoriti mas tingim olgeta kain manmeri



OLGETA yia bikpela siti bilong yumi Pot Mosbi i wok long senis planti na lukim kamap bilong planti ol nupela samting olsem ol haus, rot, bisnis, haus sik na skul.

Long sait bilong rot, yumi lukim ol ovahet bris (overhead bridge) long Koki, Hohola na Waigani klostu long Vision Senta.

Dispela em ol gutpela senis. Ol i kamap long daunim hevi bilong ol kar i bamim ol manmeri i kalapim rot long wanpela sait na i laik go long narapela sait.

Plantu manmeri bai kisim

helpim long kain bris olsem.

Tasol i no longtaim i go pinis, sampela manmeri i tok i gutpela Nesanel Kapitell Distrik Komisen (NCDC) i kamapim kain bris olsem em i no tingim wanpela hap lain bilong komyuniti.

Dispela lain em ol lain manmeri husat i no gat gutpela lek, lapun, aipas o

wokabaut krungut (manmeri husat gat disabiliti long bodi).

Ol dispela lain i tok laik yusim dispela ol bris long abrusim ol kar tasol no gat wanpela hap we i ken helpim ol long go antap long dispela ol bris.

Ol i tok ol tu i memba bilong komyuniti we ol i save vot long taim bilong ileksen, baim Gavman takis na mekim wok insait long komyuniti, tasol ol atoriti i no save givim gutpela luksave taim ol i mekim samting.

Wanpela bilong dispela ol samting ol lain husat i

gat disabiliti long bodi i tok em ovahet bris.

Ol i askim sapos NCDC inap long kamapim o mekim ol bris we ol tu bai inap long kalapim ol rot taim ol i yusim ol bris.

Wok nau i stap long han bilong NCDC long sindaun na glasim gen stail ol wokman bilong ol i yusim long mekim ol bris.

Dispela em i no long ol bris tasol i gat ol narapela sevis gavman i save givim long ol manmeri we dispela ol lain manmeri long komyuniti bilong yumi i singaut long em.

Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.

TLC swimming pul ples bilong bung



Nicky Bernard i raitim
BIHAIN long Pasifik Gem, Taurama Senta we ol bin holim swimming resis i bin pas long ol pablik manmeri na pikinini long go yusim.

Long las mun Spot Minista Justin Tkatchenko i opim long ol pablik manmeri i ken go na malolo na waswas long en, tasol yu no inap go insait nating long waswas, pilai o malolo. Yu mas baim get long go insait.

Dispela taim minista Tkatchenko opim, dispela ples i save pulap long ol manmeri na pikinini long wiken. Insait long dispela hap tu, ol i putim ol samt- ing bilong ol pikinini long pilai na amamas.

Na tu i gat ples we yu ken go na mekim liklik bung o pati long wanem i gat tripela liklik haus win bilong na ples bilong kukim mit na sosis.

Dispela ples i kamap hotpela ples bilong ol pikinini stat long krismas bilong ol tripela i go

antap long 18 yia. Ol papamama bai no inap wari long ol long wanem, dispela pool i gat ol wok manmeri long was long ol pikinini i waswas na pilai. Na i gat taim bilong ol long pilai long wara slade na summing pool.

Long sait bilong swim- ing pul ol pikinini i save yusim liklik pul we ol suma save tren long en. Long wiken ol swima i no save trening long wanem ol givim sans long ol pablik manmeri na pikinini long go waswas na ama-

mas.

Sapos i gat kompetisen bilong swim ol bai givim taim long pablik manmeri long waswas na lusim ples bilong swimming kompetisen long ran.

Sapos yu pilim hot long san yu ken go baim get tasol na go kisim gutpela kol waswas long TLC pul na bai yuk ol gut tru taim yu kam aut gen long dispela pul wara.

Ol pikini amamas long waswas long Taurama Senta wantaim trena i lainim ol long swim.



Oi poto: Nicky Bernard




TOKSAVE:

WANTOK i askim ol gutpela rida bilong em long salim ol **tumbuna stori** i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail yunit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C-Word Publishing Company, P O Box 1982, BOROKO, NCD, PNG o email edres: editorial@wantok.com.pg Telepon namba: 3252500.*

Tenkyu

Em nau! Ol pikinini i ken painim rot i go long ples wantaim Wantok lain...



STORI BILONG TUMBUNA

Olsem wanem Kokomo kisim bikpela tit?

Long bipo tru muruk na kokomo i stap olsem gutpela pren tru. Kokomo em i gat liklik tit tasol, na muruk em i gat bikpela tit moa. Orait na wanpela de muruk i wokabaut i go long wanpea gutpela ston na em i lusim tit bilong em na i wasim i stap. Orait em i lukim pren bilong em kokomo em i wokabaut i kam. Na em i tok, "Gut de pren. Yu gutpela pren tru. Yu naispela man." Na tupela i amamas wantaim na tok pilai, na tok gris, na lap tasol.

Tasol wanpela bikpela tingting i kirap long kokomo na em i ting. "Ating bai mi trikim muruk na kisim bikpela tit bilong em. Long wanem muruk i gat bikpela tit tru na em i save yusim ol long kilim ol man tu taim ol i sutim em."

Orait na kokomo i tokim muruk, "E pren muruk, ating tit bilong yu i olsem gutpela tamiok. Man, ating mi kisim tit bilong yu na mi go traim katim dispela diwai pastaim."


Orait na kokomo i kisim tit bilong muruk na i go long as bilong wanpela diwai, na em i wok long katim han bilong dispela diwai. Em i tok "Man, poroman, tamiok bilong yu i gut tru." Na muruk em i wok long lap tasol i stap. Na em i no ting bai kokomo i stilim tamiok bilong em. Tasol taim Kokomo i kamap pinis long tel bilong diwai em i tokim pren bilong em muruk, "E pren, ating mi laik lusim yu nau." Tasol muruk i tok, "Orait yu kisim tamiok bilong mi i kam pastaim." Tasol kokomo i kirap na flai i go antap wantaim tamiok bilong Muruk.

Taim muruk i lukim dispela, man, bel bilong em i kirap nogut tru na me i wok long krai tasol. Orait na em i kisim dispela liklik tamiok o tit bilong kokomo na wok long paitim long ston, na bagarapim tit tru, na em i go. Tasol muruk i sori tru long wanem, kokomo i bin kisim gutpela tit bilong em na karim i go pinis.

Nau yumi ting wanem, pasin bilong kokomo i gutpela? Sori, ating em i no gutpela. Long wanem em i olsem stil tasol. Olsem na ating, planti man long Papua Niugini ol i save mekim olsem. Ol i laik trikim arapela man na stil tu. Kokomo na muruk pastaim tupela i stap olsem gutpela pren tru tasol dispela samting i kamap na tupela i stap olsem birua olgeta.


Em i olsem, bipo yumi stap pren tru bilong God. Tasol pasin nogut i bin kamap long yumi na nau yumi no stap moa pren bilong God. Taim kokomo i kisim tamiok bilong muruk, orait tupela i kamap birua. Olsem tasol taim yumi mekim sin long ai bilong God, yumi kamap birua bilong God. Na nau yumi stap longwe long God pinis. Tasol sapos yumi bilip tru long Jisas Kraus, bai em i tekewe sin bilong yumi na bai yumi kamap pren bilong God.

EM ORAIT



EM NOGUT

Ansa bilong Wod Pilai isu 2169



PAINIM WOD PILAI

Ol wod lista:

MISTA	PILAIMANKI	TROSEL
MISINARI	REVEREN	TEPIK
KOLWARA	RABISMERI	TANIMTOK
KATRES	STRENA	VIRGO
LAUS	SOTWIN	WOKSIP
LAKA	SMOKIM	WINIM
MATAKIAU	TULIP	YUTUPELA

O E P W S E F A E B A E O N Y U I Q K G Z E R I J
 I C B R C R H O J A M B Y N E N E N H E S X E E A
 E P C E A E T S G J A M W T T T R O S E L I O M N
 A F P D B F H P T N T P V F A A P K P H R A P C L
 P S H J R G L H E O A A O R A I T I M E U Q K B P
 X I F Z M H F E O M K P E L M T T G M T R V X A R
 R T H S E F E O S E I P E A I X R S A O T E T L E
 P E X R O D E N E L A P I O V S I B O R A E S H S
 L G F N A O R I U L U P N L T B M G T T O A R E E
 R L I R I O O T S T E P D B A A R A S B F R E B N
 T O L E C C S E U S Q G E R N I W I N I M E V M V
 T D E E A K R Y E S R D G H V L M X I E O A E I F
 E A H K A A X G W T Q K O L W A R A O G T C R K R
 L C K C C O S Z E C K I I A S U L S N I A A E M N
 E T V E X R C W D S B S M E T S V O D K N W N F M
 X O T T G F O N D Z M R R J R N X T H I I E T E K
 V S H S G H E D D S Y T M I E Y S W S G M S E I L
 J E B T O A Y N M K A S E X N A Y I G A T S P M E
 C N N P E K B W O K S I P T A F M N S M O K I M I
 I T D M J E O R N L M R X T S H F R E B K K K E S



TOK PISIN NEWS

from Radio Australia
radioaustralia.net.au

Hatim TOK PISIN long
Radio Australia
101.9FM
Port Moresby

Tok Pisin Service
6am - 7am 6000; 7240(KHZ)
7pm - 9pm 6895; 6020; 9710; 1280(KHZ)

Stil pasin insait long solwara bilong PNG



Patrol bot bilong Australia i patrol klostu long solwara bilong PNG. Foto: ABC

Caroline Tiriman i raitim

WES Nu Briten Gavana i autim wari blong stil pasin insait solwara long Papua Niugini. Gavana Sasindran Muthuvel i askim Nesenel gavman long apim wok bilong polis long lukautim ol pipel i save ran long solwara na stopim ol

raskol i save stilim ol liklik bot na bagarapim ol pipel. Gavana Muthuvel i mekim dispela askim bihainim ol ripot olsem pasin blong Piracy o stilim ol samting bilong ol pipel long solwara nau i wok long go antap long planti hap bilong kantri. Long dispela wik, Asisten Komisina biloong Polis ong

Noten-Momase Koman, Peter Guinness i tok dispela kain pasin nogut i wok long kamap bikpela long rijon bliong en. Long 2011, 6-pela saientis bilong Institut ovMedikal Risets i bin lus long ol solwara iblong Wes Nu Britain Provins, na i kam inap nau ol i no painim ol yet.

Gold Ridge Mine i no tromoi posin insait long wara

IAMAN bilong Gold Ridge Community Investment Limited long Solomon Ailani tok ol midia ripot olsem kampani i bin tromoim posin wara insait long ol riva i no tru. Walton Naezon i tok kampani i bin kisim laisin long namba 30 Mas bilong

putim wara long tailings dam i go insait long riva. Na i kam inap nau, em i tok ol i bin pamim pini samting olsem 300,000 kubik mita bilong wara we ol i tritim pinis i go insait long Tinahulu Riva. Mista Naezon i tok olgeta atoriti bilong gavman na

independen lain i bin wanbel pinis olsem level bilong posin insait long tritim wara ol i putim go insait riva, em i seif. Em i tok olgeta toktok we i bin kam aut long midia olsem laip bilong pipel i stap long birua long ol posin long main, ol i giaman.



Gold Ridge Mine we i soim tu Tailings Dam long beksait . Foto: ABC

Solomon Ailan Famili Proteksen loa

Caroline Tiriman i raitim

Solomon Ailan nau i gat strongpela lo agensim pasin bilong paitim nating na bagarapim ol narapela o domestik vaiolens bihain long ol i bin lonsim dispela loa long Fraide long wik i go

pinis. Josephine Teakeni, Dairekta bilong Vois Bilong Meri wantaim National Council of Women i tok sapos wanpela man o meri i brukim dispela loa ol bai go long kalabus long tripela yia. Ol pipel husat i save haitim na

helpim ol pipel em ol i save kamapim violens bai save go tu long kalabus. Mis Teakeni, i tok em i laik lukim dispela nupela loa bai helpim long daunim vaiolens long kantri.

Solomon Ailan sik suga i go bikpela

Sam Seke i raitim

SAMTING olsem 13.5 pipel long olgeta 100 pipel long Solomon Ailan i gat sik daibitis o sik suga – na hevi ya i go bikpela moa yet. Dispela i kamap bikos planti pipel long Solomon Ailan i save kaikaim planti stoa kaikai na i no save kaikaim ol gaden kaikai tumas olsem bipo. Wanpela sevei o wok painimaut ol i bin wokim

10-pela yia i go pinis i soim olsem 93.6 pesen bilong pipel long Solomon Ailan i no save kaikaim inap prut an kumu. Ministri bilong helt hi tok aut moa long dispela wari taim Solomon Ailan i joinim ol kantri long wol long makim Wol Helt De. Senia Nutrisen Opisa long ministri i tok as we daibitis sik em i go antap long Solomon Ailan tu hem long pipel i no save mekim inap ekseisais.



George Palua PS bilong Home Affairs na Martin Rara i pilai tebol tenis olsem hap blong stopim daibitis. (SIG foto)

Vanuatu i namba 6 kantri long sik daibitis long wol

Caroline Tiriman i raitim

WOL Helt Ogenaisesen (WHO) i autim dispela toktok long makim Wol Helt De long dispela wik. Lain bilong WHO i makim Vanuatu olsem em i namba 6 kantri long wol long gat bikpela namba bilong ol pipel bilong en i gat sik suga o daibitis. WHO i bin tokaut long dispela mak taim ol i bin makim Wol Helt De long na i tok samting olsem 3.7 milien pipel iwok long dai long sik suga insait long wan wan yia. Long Pasifik rijon, samting olsem 50 pesen t long ol long Samoa i gat dispela sik taim Vanuatu i gat 21 pesen.

Pacific Saiklon na Ren emi taim bilong en

Caroline Tiriman i raitim

OL weda sistem we i bringim planti ren na sampela saiklon long Pasifik rijon long dispela taim em i kamap long taim bilong en yet. Dairekta bilong Nesenel Weda Sevis long Papua New Guinea, Sam Maiha i tok ol weda sistem we i bringim planti ren na sampela saiklon long Pasifik rijon long dispela taim em i taim bilong en yet. Mista Maiha i mekim dispela toktok bihainim askim bilong Radio Australia

sapos ol saiklon na ol bikpela ren long mun Mas na long dispela mun i narakain long ol taim bipo. Saiklon Zena we i bin kamapim planti bagarap long Fiji, na kamapim planti bikpela ren long Solomon Ailan, Tonga na Vanuatu long dispela wik i bin bihainim Saiklon Winston we i bin bagarapim tru Fiji long mun Mas. Long wik i go pinis tu, ol bikpela ren long sampela hap long Hailans rijon bilong PNG i bin kamapim sampela graun bruk na blokim ol rot.



Piksa bilong saiklon long Pasifik rijon. Foto: ABC

Ol Panama Pepa: PM David Cameron i laik strongim takis lo

Praim Minista bilong Briten, David Cameron i tok em bai strongim ol takis lo long stopim ol lain husat i no save baim takis, long stopim ol pipel i toktok long bikpela mani bilong em na mekim ol pipel i gat bilip long em.



Sampela lain i tok ol toktok bilong David Cameron's i bilong helpim ol kain lain olsem em. (Reuters):

Crown Dependency, olsem Jersey, bai i mas giviminfomesen long gavman bilong Briten-long husat i papa bilong ol kampani i stap long ol dispela ples.

Em i tok bai em i putim lejislesen long stopim ol wokman bilong kampani long tokim ol kastoma bilong ol long ol pasin bilong abrusim takis. Em i tok gavman bilong Briten i mas strongim lo long stopim ol lain i brukim lo.

Fainens Minista George Osborne i bin tokaut long dispela long Mas 2015, tasol pastaim ol i tok long putim lo long kamapim ol dispela senis long yia 2020..

Long Fonde, Mista Cameron i tokaut olsemem i bin kisim gutpela profit long taim em i salim ol sea bilong em long dispela fan long 2010.Long Sandeem i putim autol takis rekot bilong em long las 6-pela yia.

Long palamen em i tokaut gen long fainens bilong em na tok olsem Mista Osborne i tokaut pinis long ol takis bilong em.

em i "dodgy Dave". Tasol Mista Cameron i strongim poin bilong ol lain husat i yusim mani long lukautim famili bilong ol.Papa bilong em i bin kirapim wanpela akaun long Panama long lukautim famili bilong em. Nem bilong em i bin stap insait long dispela ripot bilong Panama Pepa.

Oposisen lida, Jeremy CorbynHe i tok planti ol ovasis teritori bilong Briten olsem British Virgin Islands, Cayman Islands, na ol

Bernie Sanders i resis long winim vot bilong ol meri



Bernie Sanders na Hillary Clinton long namba wan Demokratik Pati dibet.

Planti moa yangpela meri i wok long sapotim Bernie Sanders moa long Hillary Clinton i soim olsem moa meri i lukluk tu long polisi bilong ol kendidet na tu long ol meri kendidet, Lucia Osborne-Crowley i tok.

Long ol wik i kam inap nau, moa pipel long wol i wok long putim ai long tupela kendidet husat i resis long kisim nominesen bilong Demokratik

Pati bilong USA long resis long US Presiden ileksen. Ol tupela kendidet ya em Hillary Clinton, husat i bin Seketeri bilong Stetna seneta Bernie Sanders bilong Vermont.

Ol risal bilong New Hampshire praimer i soim olsem Sanders i go pas long Clinton nau. Bikpela askim i wok long kamap watpo na ol meri i no sapotim Hilary Clinton.

Sapos Clinton i winim Sanders long nominesen, ol yangpela meri long kempen bilong Sanders em i bikpela samting. Sapos Clinton i bungim wanpela kendidet bilong Novemba, bai em i save olsem ol yangpela meri tude i laikim wanpela lida husat bai i harim tru wari bilong ol, wankain olsem Sanders i tokim ol long bilip long en.

Zika vaires i bikpela moa nau

Dispela Zika vaires em i "bikpela moa"na dispela natnat i save karim dispela vaires i stap long 30 stet bilong USA, ol top save-man bilong helt long Amerika i tok.

Ol ki poin:

•Nidim mani inap long planti biliendola long stopim tasol Congress i no tok orait yet.

•Vairus i kamapim-planti arapela hevi long taim ol mama i bel.

• Stat testim veksins (vaccine) trials long Septemba.

Dispela vaires i kamapim planti moa-hevi long taim ol mama i bel, i no ol liklik het bebi tasol.

Vairas i ken mekim mama i karim bebi hariaptumas, bebi i aipasna ol arapela hevi, US Centre for Disease Control and Prevention (CDC) i tok.

I gat bikpela wari nau olsem i gat planti handet o tausen kain hevi olsem i kamap



Ol helt opisa long USA i tok ol i nidim moa mani long pait egensim dispela Zika vaires. (AFP: Marvin Recinos)

pinis long Puerto Rico, prinsipal deputi dairektabilong CDC Dr Anne Schuchat i tok.

Em i tok ol i hop bai vairasbai i no inap kalap i go long bikples USA, tasol ol i mas redi tasol na was i stap.

"Olgeta samting mipela i painimaut nau long dispela vaires i mekim mipela i pret moa yet," Dr Schuchat i tok.

"Nau mipela hop dispela vaires i no inap

kamap long bikples USA, ol stet i mas redi tasol na wet. Mipela i no save wanem kain hevi bai kamap."

Presiden Barack Obama i bin askim long \$US2 bilien long helpim long stopim dispela vaires tasol Congress i no tok orait yet.

Zika, i kamapim planti bagarap long ol nupela bebi long hap bilong Brasil, na i wok long surik i go hariap

long ol arapela kantri long Latin Amerika na Caribbean.

White House i tok las wik olsem sapos i no gat imejensi fan, baiem i givimdispela \$US589 milien, mani em Congress i givim long stopim sik Ebola vaires, longredi long Zika vaires bipo long em i kamap long bikpela USA.

Dr Anthony Fauci, dairektabilong US National Institute of Allergy and Infectious Diseases, i tok sapos Congress i no givim imejensi mani bilong stopim Zika, bai US gavmanigivim mani ol i makim pinis long wokim risets long malaria, tuberculosis na wanpela universal flu vaccine.

Las wik Brasil i tok i gat moa long 1,046 keis bilongol bebi i kamap wantaim liklik het na ol i bilip Zika vaires long bodi bilong mama i kamapim dispela hevi.

Ivanka na Eric Trump i no inap vot long Nu York



Eric (L) na Ivanka Trump i pilim nogut bikos ol i leit long rejista. (Reuters):

Tupela pikinini bilong Donald Trump i leit long rejista olsem na bai ol i no inap long vot long praimer i ileksen long Nu York long neks wik.

Papa bilong ol i wok long go pas long ol Repabliken kendidet long resis bilong winim sia bilong Presiden bilong USA.

Ivanka, 34, na Eric, 32, i tok ol "i no kliia long ol rulna ... ol i no rejista long taim", Mista Trump i tokim US Fox News.

"Ol i pilim nogut tru,"em i tok.

"Ating ol i bin ting bai ol i mas rejista wanpela yia pastaim long taim bilong ileksen olsem na ol

i no mekim. Olsem na Eric na Ivanka, bai i no inap vot nau," em i tok.

Ol lain bilong Nu York i mas rejistanawem pati bilong ol long Oktoba 9 las yia sapos ol i laik votlongEpril 19 Demokratikna Repabliken praimer i vot.

Moran i putim kiau na i dai

WANPELA moran em ol i holim em i stap longpela taim tru, i dai tripela de bihain long ol i painim em long Malaysia. Tasol em i bin putim wanpela kiau bipo long em i dai.

Longpela bilong moran em eit mita na hevi billong en 250 kilograms, wanpela opisa bilong Malaysian Civil Defence Department (JPAM) i tokim The Guardian niuspepa.

Moran husat i gat rekot olsem longpela snek ol man i holim em inap long mak bilong 7.67 mita na 158.8kg em wanpela reticulated Medusa moran, Guinness World Records i tok.



Ol i singaut wanpela tim bilong 6-pela JPAM wok lain i go holim dispela snek long Malaysia, na ol i ting em i wanpela reticulated moran.Ol wokman i bin painim dispela snek long ples we konstraksen i wok long kamap, Malaysian Star niuspepa i bin ripot.

Ol opisa i tok snek i painim ples bilong putim kiau na em i bin dai long taim ol man i holim em.

Ol reticulated moran i save stap long hap bilong Saut Is Esia, na ol i longpela snek tru long wol namel long 3 na 6 mita.

SOPAS Haus sik kisim helpim long PNGTF na GE

Jeneral Ilektrik (GE) PNG wantaim patnasip bilong Traibel Faundesesen i givim presen bebi hot bet na pototerapi yunit i go long Sopas Haus sik long Enga Provins.

GE PNG na PNG Traibal Faundesesen strongim patnasip bilong ol yet long helpim wok bilong ol mama na pikinini i no ken dai long taim bilong karim bebi o taim bebi i liklik tumas yet insait long PNG wantaim gutpela rolaut bilong V Sken Al-trasaun Pailot Program long Enga Provins.

Wanpela bebi bet na pototerapi yunit i kost olsem AU\$15,000 or PGK37,500 ol i givim

olsem presen i go long Sopas Haus sik long Enga Provins. Sif Ekseketiv Opisa bilong Enga Provinsal Atoriti, Aaron Luai, wantaim Dairekta bilong Kuretiv Helt Sevis (EHPA) Dokta Guboro Urae, na Sif Ekseketiv Opisa bilong Sopas Haus sik Dokta Lino Tom i bin stap long bungim ol lain bilong PNG Travel Faundesesen na GE PNG.

Dspela em i namba tut aim long GE i patna wantaim Traibel Faundesesen long givim dispela kain presen i go long ol haus sik bilong Papua Niugini. I gat wanpela moa bilong dispela i stap yet long givim long narapela

bikpela haus sik long kantri. .

Traibal Faundesesen's Dairekta bilong Opere-sens Michelle Hau'ofa i tok, "Helt bilong Mama na Pikinini em i bikpela samting we i save soim sain bilong sosel developmen long ol komyuniti bilong yumi na kantri. Em i save soim stret sosaiti bilong yumi i stap long wanem mak.

Bilong wanem ol mama na olgeta meri i save soim piksa bilong sindaun bilong ol family na ol pikinini i save makim laip bilong yumi Inog bihain na tu ol bai karim wok bilong kantri i go het long bihain

taim olsem ol lida biklong tumoro. Olsem na mipela ol lain bilong PNG Traibel Faundesesen i gat strongpela bilip long sapotim wok bilong Provinsal Helt Atoriti long ol program bilong helt bilong ol mama na pikinini na mipela i amamas long ranim dispela wantaim patnasip bilong GE Ilektrik (GE)."

Dispela presen i soim komitmen bilong GE long helpim planti narapela lain long sindaun bilong ol na sosel developmen long PNG. GE bai wok patna yet wantaim Traibel Faundesesen long sapotim helt na edukesen sekta long kantri PNG.



Bungim pes gen. Michelle na Pretron bilong Sopas haus sik i bungim pes gen long taim Michelle go givim bebi woma.



Lukluk raun long nupela ol haus bilong ol Dota bilong Sopas Haus sik long Wabag.



Ol sumatin wantaim sampela dota i sanap wantaim bebi woma na ol lain bilong Tribal Foundation. Ol Poto: Nicky Bernard



Nupela bas bilong ol sumatin i luk stail.



Sampela bilong ol nes sumatin i sanap long fran bilong klas rum bilong ol.

Kemish joinim Newcrest Mining

HAI Komisina bilong Australia long PNG bipo, lan Kemish, i joinim Newcrest Mining Limited olsem eksekutiv jeneral menesa bilong pablik afeas na sosel pefomens.

Menesing Dairekta na Sif Eksekutiv Opisa bilong Newcrest Mining, Sandeep Biswas, i tok Mista Kemish bai kamap wanpela memba bilong eksekutiv komiti, stat long Me 16 long dispela yia.

Mista Biswas i tok Newcrest i laik kirapim

gutpela poroman namel long kampani, ol seaholda, ol papagraun na gavman bilong PNG.

“Save na ekspirens bilong Mista Kemish long politik, intenesenel afeas na gavman long PNG na Indonesia bai helpim Newcrest long ranim operesen gut long dispela tupela kantri we mipela i gat maining,” Mista Biswas i tok.

Mista Kemish i bin wok olsem Hai Komisina bilong Australia i kam

long PNG long yia 2010 inap 2012.

Em i bin sapotim lilektoral Komisina i ranim gut nesanel ileksen long 2012 taim em i bin wok olsem Hai Komisina.

Bihain long dispela wok, em i bin joinim ExxonMobil olsem senia dairekta bilong Asia-Pasifik Ekstenal Afeas.

Mama i bin karim Mista Kemish long Pot Mosbi na em i bin skul long Waigani Praimeri Skul. Em i save gut long Tok Pisin.

Saina wokman i dai - Basamuk Rifaineri pas

RAMU NiCo Projek operesen long Basamuk Rifaineri long Madang i stopim wok bilong en bihain long wanpela birua i bin kamap na wanpela wokman bilong Saina long rifaineri prosesing plent bilong ol i dai.

Ol wok painimaut i stat nau long dai bilong dispela wokman bilong Saina na tupela PNG wokman husat i kisim bagarap.

Tupela PNG wokman nau i stap long Mod-

ilon Haus Sik bihain long helikopta i karim ol i go long hap.

Ramu NiCo (MCC) i tokaut long wanpela stetmen bilong en olsem ol medikol tim wantaim imejensi rispons tim (ERT) i bin traim long givim win long dispela Saina wokman tasol i no nap.

Ramu NiCo Menesmen i tokaut olsem tupela PNG wokman i wok long kamap orait na nau i stap long stebol kondisen.

Dispela birua i bin kamap long 7:50 long Tunde morning, Epril 12 long taim bilong wok long prosesing plent.

“Mipela sori tru olsem mipela lusim wanpela wokman bilong mipela. Nau yet mipela redi long tok save long ol famili bilong em,” menesmen i tok.

Ramu NiCo i givim ripot bilong dispela birua i go pinis long Mineral Risoses Atoriti

(MRA) na i putim banis raunim eria long moa wok painimaut i kamap long dispela birua.

“Mipela i banisim pinis eria we birua i kamap na no gat bagarap bai kamap long ol arapela wokman bilong mipela.

“Mipela tok save tu long ol famili bilong ol arapela wokman bilong mipela olgeta i stap seif,” Menesmen i tok.

Mainland Holdings mekim K7.2 milien winmani

W A N P E L A biknem kampani bilong PNG, Mainland Holdings Limited, i mekim bikpela winmani na skelim i go long ol seaholda bilong em.

Siaman bilong MHL, William Lamur, i tok bikpela mani long dispela winmani i go long bikpela seaholda bilong MHL, husat i NASFUND na sampela i go long ol seaholda insait long Morobe provins.

MHL i gat operesen bilong em i stap long

Lae na yia 2015 i bin wanpela kain fainensal yia we kampani i bin bungim sampela hevi long sait bilong pundaun bilong ikonomi tasol em i mekim bikpela winmani na givim i go long seaholda bilong em.

“Pundaun bilong foren eksens na foren karensi i bin givim hat taim long MHL tasol mipela i mekim winmani. Mi laik tok tenkyu long ol wok manmeri bilong kampani,” Mista Lamur i tok.

Nupela kampani redi long helpim ol papa bilong haus

SAPOS yu wanpela papa bilong haus na yu laik salim haus bilong yu tasol yu no gat inap mani long baim niuspepa advetaismen, i gat wanpela nupela kampani bilong helpim kain man olsem yu i stap.

Sapos yu wanpela man o meri husat i gat rent haus tu na yu laik putim notis i go aut long pablik tasol yu painim wanpela gutpela maket long toksave long ol klaien bilong yu, ANX Real Estate Brokers i redi long helpim yu.

“ANX i save kamap olsem namel man long helpim ol papa bilong haus i salim haus hariap tru long gutpela prais.

“Mipela i painim ol manmeri husat i gat haus o propeti long salim tasol ol yet i painim hat long salim bikos ol i no save long propeti maket.

“ANX i save long tromoi wanem kain tok pisin long ol baia bilong haus. Ol rilistet kampani i save sasim bikpela mani long salim propeti o haus aninit long



ANX Real Estate Brokers i gat gutpela koneksen long salim haus bilong yu long propeti maket.

kampani bilong ol.

“Tasol mipela i save sasim liklik mani long ol papa bilong haus husat i laik yusim ol koneksen bilong mipela long putim haus o propeti bilong ol i ausait long maket,” wan-

pela mausman bilong kampani i tok.

Dispela mausman i tok ANX i redi tu long helpim ol arapela manmeri husat i save putim haus bilong ol long rent.

“Sapos yu wanpela papa

bilong haus, na yu laik putim toksave long niuspepa olsem haus bilong yu i redi long putim long rent, yu mas kam lukim mipela, na mipela bai helpim yu.

“Sapos yu laik go long niuspepa na putim tok-

save, bai yu baim bikpela mani. Mipela i save helpim ol liklik manmeri long mekim propeti na haus bisnis na mipela i save sasim liklik mani tasol.”

Wanpela mausman bilong ANX i tok ol i save kamap olsem namel man long salim ol haus sapos wanpela papa bilong haus i laik salim haus bilong em.

“Mipela i save kamap olsem namel man. Mipela i save stap namel long ol baia na sela bilong haus.

Sapos wanpela man i laik salim haus bilong em tasol em i painim ol baia long baim dispela haus, mipela i ken kisim ol baia i kam na soim ol long dispela haus.

“Sapos wanpela man o meri i painim ol rent haus bilong rentim na slip, ol i mas kam lukim mipela.

Mipela i redi long helpim ol papa bilong rent haus tu long edvetasim rent haus bilong ol na pulim moa kastoma i kam insait,” em i tok.



MANILA
k1,708*

◀ RETURN ▶

Call toll free 180 3444 for more information.

Air Niugini
www.airniugini.com.pg

*Ex Port Moresby. Conditions Apply.

Literesei buk bilong ol meri na pikinini

Elisabeth Medline Ling i raitim FAMILI Buk bilong Maria em i wanpela gutpela i gat toktok bilong lainim ol rurel fama na ol pikinini bilong PNG.

Wanpela projek bilong ol meri wokim bisnis we Australia Senta bilong Intenesenel Egrikalsa Risets (ACIAR) i fandim long lukluk long wok bilong ol meri long bisnis nau i kamapim wanpela lain buk pinis long kamapim gutpela literesi long ol pikinini na ol bikipela man na meri wantaim isi Tok Inglis na Tok Pisin long lainim long haus o long klasrum.

Maria Big Books o Maria's Family Books em ol lain buk bilong lainim ol lain i ritim buk, yangpela na bikipela manmeri tu long ritim ol toktok stori long isip Tok Inglis na Tok Pisin na long kisim moa save wantaim ol dro na ol piksa.

Yunivesiti bilong Canberra long Australia; NARI, Pasifik Edventis Yunivesiti, Baptis Yunien bilong PNG husat i bin bung long kamapim dispela projek i bin lukim olsem ol meri i mas kisim moa save long wei bilong wokim bisnis, wokim ol kaikai bilong salim na long basetim mani ol i kisim taim ol i salim kaikai.

Planti meri ol i bin wok wantaim i no save long rit na rait, olsem na tingting bilong kamapim ol matiriel bilong lainim samting em ol i mekim i go isi tru long wei bilong piksa stori. Ples we ol i holim ol dispela projek em long Is Nu Briten na long Westen Hailans provins.



Buk kiping trening long Vunapalading.



Fainensel Literesi trening long Tinginagalip.

Ol foto: NARI komyunikesen

Ol sevei i bin kamap pastaim long projek i bin soim olsem ol meri fama na ol famili insait long tupela hap olsem ol meri i wok long mekim liklik rong tru long ol wei bilong salim ol maket samting bilong ol long gaden na ol i no save wokim plen bilong yusim mani na sevim bilong famili ol long bihain taim. No gat save long rit na rait tu i pasim rot bilong ol long kamap strong long ikonmik na sosel laip bilong ol na em i stopim ol long kisim gutpela trening.

Bikipela samting long Maria Famili Buk em long developim fainensel na maket skil wantaim topik bilong redim ol samting bilong salim long maket, i go long wei bilong menesim mani, mekim disisen long ol mani na long plenim bihain laip. Ol i kisim skul

long tupela tokples we em i isi long ol i lainim na long kamapim save bilong rit namel long ol mama na ol pikinini bilong ol.

Ol bikipela toktok insait long dispela ol buk em long; wokim ol famili tim long bung wantaim long plenim, toktok na putim ol mak bilong lainim na menesim mani wantaim, lainim ol pikinini long wei bilong yusim ol benk long sevim mani bilong bihain bilong ol na long skelim wanem samting em i moa bikipela long narapela long taim ol i laik yusim mani, kamapim wanpela prodaksen sistem long olgeta taim bai salim ol gutpela kwaliti samting tasol, helpim ol pikinini long laikim wok bilong egrikalsa olsem wanpela wei bilong kisim mani bilong ol yet, ol mama i nambawan tisa long haus

taim ol i mekim samting wantaim ol pikinini long lainim pasin bilong wok, ol famili kamapim gutpela sindaun wantaim wok fama, na lainim rit i save kamapim moa save.

Wantaim ol meri fama, ol i skulim tu ol skul tisa long wei bilong yusim ol buk bilong helpim ol insait long klasrum long skulim ol sumatin.

Maria famili go long maket na Maria famili i sevim kina em tupela buk we Barbara Pamphilon na Kym Simonchini i raitim na Damien Veal i wokim dro long ol. Francina Thomson i bin tanim ol dispela buk long Tok Inglis i go long Tok Pisin na ACIAR i givim ol stori bilong raitim.

Ol stori na ol piksa i soim ol kalsa bilong Westen Hailans na Is Nu

Briten we ol i bin kamapim taim ol i bin toktok wantaim ol meri fama na ol pikinini bilong Baiyer Veli bilong Westen Hailans na Tinginagalip na Vunapalading komyuniti long Is Nu Briten.

Deputi Praim Minista, Leo Dion i bin opim ol dispela buk las yia long Rijonal Senta long Kerevat.

Em i bin mekim gutpela tok long NARI na ACIAR long kamapim wanpela kain samting olsem bilong helpim ol meri long PNG na long givim pawa long ol long 'tingting long bisnis' long ol liklik egrikalsa bilong ol.

Em i mekim wanpela tok promis long putim mani long ol i prinim planti bilong ol dispela buk long go long olgeta skul insait long provins bilong em.

Rais fama i laik kamapim senis

Wanpela rais fama bilong Yaware-mum viles insait long Jiwaka provins i go long Lae, Morobe provins long painim wanpela teknoloji we i no inap kost bikipela mani long milim rais na helpim ol rais fama long ples bilong em.

Peter Tumbo, husat i bin wok long rais fam bilong em inap long 6-pela yia nau i tok komyuniti bilong em i no bin gat ol gutpela tul bilong milim rais na ol i traim kain, kain wei long milim rais pastaim long ol i kaikai.

Strongpela tingting kisim Mista Tumbo na em i painim rot bilong em yet i go daun long Lae long lukim ol NARI Fam Mekenaisesen projek long Bubia na long lainim wei bilong mekim Kisar we em bai lainim ol

lokal pipel long ples taim em i go bek.

Kisar rais mil em i no kost bikipela mani. Ol i bin mekim wantaim wok-bung bilong ol rais fama bilong Madang na NARI aninit long wanpela Yuropien Yunien / Afrika Karibien Pasifik fan projek.

"Mi laik lainim wei bilong mekim Kisar na long stap sambai long bringim dispela sevis i go long komyuniti. Mi no bin pinisim gut skul bilng mi tasol mi gat planti save long mekim ol kundu dram, we mi inap long yusim na wokim wanpela Kisar rais mil," Tumbo i tok.

Em i tok olsem em i save wokabut longwe i go long ol ples olsem Banz long wan na hap de na wanpela de wantaim kar, long milim rais. Nau

dispela taim bai sot bikos Kisar mil i kam pinis long komyuniti bilong em.

Em i tok ol pipel long komyunit bilong em i wetim em tasol long go bek long ples wantaim nupela save long stretim rais na bai gutpela rais bilong ol i no inap long go long pipia bihain long ol i kisim long fam.

Momase Rijonal Senta Risets Developmen Kodineta na saveman bilong Rais na Gren Dokta Peter Gendua i tok em i wanbel tru long lukim ol lokal fama i kamap long opis na askim long ol masin bilong planim rais, kisim ol sit na long ol mekenais tul olsem Kisar.

"Mipela i sindaun wantaim ol na tok klia long wei bilong yusim ol mekenais tul na long wei bilong



Ol tripela rais fama i go lainim wei bilong wokim na yusim Kisar mil mekenais masin bilong milim rais. Foto: NARI Komyunikesen

mekim ol tu. Mipela bai givim ol tok save pepa olsem ol NARI Toktok tu," Dokta Gendua i tok.

Dokta Gendua i gat bilip olsem Kisar em i wanpela gutpela tul we

inap long helpim ol rurel rais famil long Papua Niugini na em i amamas tru long lukim olsem wok bilong Kisar i go bikipela long kantri.

Translation jobs, Pidgin or Motu, Big or Small?

Call the experts to get all your translations done faster at an affordable price!

Call us now on Ph: (675) 325 2500 or email: editorial@wantokniuspepa.com and ask for the Advertising team for a quote.

Word Publishing Company

Publisher of **WANTOK**

Canterbury winim Melbourne Storms

OL Canterbury Bulldogs i statim sisen wantaim strongpela win, 18-12, egen-sim Melbourne Storms long AAMI Park long Mande nait futbol.

Long taim pilai i bin stat ol Storms i bin strong tasol Moses Mbye i kisim bal na ran strong i go daun long fil na putim namba wan trai.

Orait 20 minit bihain long gem, Sam Perrett i abrusim Marika Koroibete na kisim bal em Josh Reynolds i bin kikim na putim namba tu traime bilong ol Bulldogs.

Tohu Harris i putim namba wan trai bilong ol Storm bipo long hap taimm. Bi-hain long hap taim skoa i bin level long taim Young Tonumaiepa i winim bal.

Klostu ol Storm i abrusim ol, tasol Bulldogs i strong long defens na ran strong. Holland i brukim banis bilong ol Dogs na putim las trai bilong nait. Melbourne Storms i wok long traime strong tasol ol i no inap brukim banis. Ol Bulldogs i strongim 2016 rekot bilong ol wantaim 4-pela win na tupela lus.



James Graham wantaim ol Bulldogs i strong tumas na Storms i no inap winim ol.



Alan Tongue i bin stap long taim bilong opim dispela program. Program ol i kolim, Yumi pilai takol, ino domestik vailens.

Ol NRL pilai skulim ol yangpela

WANPELA nupela program i kamap nau long skulim ol ragbi pilai long lusim belhat bilong ol long ples bilong pilai, olpela Canberra Raiders kepten, Alan Tongue i tok.

Tongue wantaim Nathan Merritt, Chris Newton na Dylan Farrell, em ol embasada bilong dispela program ol i kolim Tackling Violence. Dispela program i bilong helpim ol pilai long kontrolim belhat bilong ol.

Dispela program i bin wok bung wantaim ol rijonal klap long ol komyuniti we i gat planti ol hevi bilong domestik na famili vailens. Ol i skruim nau i go long 21 klap long stet na ol ples insait long siti olsem Redfern All Blacks na East Campbelltown Eagles.


Adam Reynolds go bek long South Sydney

ADAM Reynolds bai go bek long gem namel long South Sydney na North Queensland long dispela wiken.

Em i bin kisim bagarap na stap long sailtain. Nau em i orait gen, bai Cody Walker i lusim ples bilong em.

Luke Kerry i no inap pilai bikos em i stap long saspensen. Olsem na long Fraide nait gem long Townsville, kosa Michael Maguire bai i putim tupela hap bek tasol long pilai.

Keary na Walker i bin mekim gutpela wok long lukautim sait long taim Reunolds i no bin stap, long posisen bilong hap bek na faiv eit.



Cody Walker

Man tromoi botol long NRL gem

OL polis i sasim wanpela man husat i tromoi botol i go insait long fil long taim ol Canterbury Raiders i pilai egen-sim Canberra Raiders long Mande nait futbol long Belmore spot graun.

No gat wanpela man i kisim bagarap tasol botol i abrusim wanpela Raiders pilaia na i pas long banis na bruk.

Ol polis i arestim wanpela man husat i gat 39 krismas, long haus bilong em long Rouse Hill long not Sydney. Ol i sasim em long mekim bikhet pasin long pablik ples.



Ol sekyuriti i soim we botol i pundaun. (AAP: Mick Tsikas)



GLASIM RAMU NiCo PROJEK



Wanpela Ramu NiCo, Wanpela Komuniti

Ramu NiCo Givim Senso Opereta Trening

RAMU NiCo Menesmen (MCC) Limited i bihainim toktok na kondisen bilong Mineral Resos Autoriti (MRA) na i givim trening long 23 lokal senso opereta long wok wantaim kampani long KBK Main Divilopmen Dipatmen.

Las wik Fraide, Epril 8 KBK Main Divilopmen Dipatmen 他im wantaim Human Risos Dipatmen bilong Ramu NiCo kamapim trening long rot long yusim senso long katim diwai. Dispela trening i givim test na trening tu long ol nupela lain husat i aplai long wok olsem senso opereta wantaim Main Divilopmen Dipatmen long KBK Main.

Long wik antap 31st ov Mas dispela ol 23 pela applicant i sindaun long theory tes anap long Basamuk na las wik ol wokim practical.

Dispela 23-pela lain husat i bin aplai long wok wantaim Ramu NiCo long KBK long wik antap Mas 31 i bin sindaun long tiri tes we i bin kamap long Basamuk na las wik ol i wokim pretikol trening bilong ol.

Main Divilopmen deputi Supritenden, Sioni Teatutai, Loging Kontrakta, Sobi Giok na Loging Supavaisa, Malcolm Suve i bin stap long lukim ol dispela lain man wokim trening bilong ol yusim senso long katim diwai na palang.

Mis Gumaim tok dispela trening em bilong testim save bilong ol na long wankain taim lainim ol long nupela wei wantaim sefti stendet long wok insait long main.

“Mipla kisim recommendation bilong MRA bihain long hevi kamap long Krumbukari main site wei i lukim wanpla opereta i dai na trenim ol dispela lain long kisim save na husait pasim tes bai go wok insait long main developmen dipatmen antap long Kurumbukari,” Mis Gumaim tok.

Mista Giok, husat i go pas long tisisim ol long wok bilong senso na rot long yusim senso wantaim sefti stendet amamas tru long ol dispela ol man husait kamap long trening.

“Planti bilong ol dispela apliken em ol man husat gat savelong wok wantaim senso na i bin wok wantaim ol loging kampani bipo,”

“Dispela i mekim isi long mipla long lainim ol gen long besik samting na bikpela samting long yusim sefti tuls na ol samting olgeta taim bilong wok,”

Em tok ol bai skelim ol dispela husat i kamap pinis long trening na kisim ol wanem taim kampani nidim ol long wokim wok insait long main.

Kurumbukari Main Divilopmen Deputi Jeneral Menesa Mista Sioni Teatutai i amamas tu long lukim ol dispela 23 pela man bihainim sefti stendet long werim werim sefti ikwipmen olsem PPE (pesinol proktektiv ikwipmen) na katim diwai long soim skills bilong ol na soim wanem samting ol i lainim long tiri lesen.



KBK Logging supavaisa Mista Giok lainim ol lain long putim diwai long masin na katim.




Wanpela long ol apliken katim diwai long soim save bilong em.



Wanpela treini lain long katim diwai.



Ol treini kisim grup foto wantaim ol bosman na Superintenden bilong Ramu NiCo HR Rikrutmen Linda Gumaim.



Etletik PNG i tokaut long kalenda

ETLETIK PNG (APNG) i tokaut long kalenda bilong ol long ol resis bai kamap long yia 2016, bihain long ol i bin stretim taim tebel bilong resis.

Dispela kalenda i stap long websait bilong APNG na sampela kopi bilong ol em ol i salim insait long ol hap bilong spot long stat bilong dispela yia.

Nesanel Sempionsip em ol bai stat resis long Betde bilong Kwin long Jun na planti etlit i lukluk long resis long dispela sempionsip.

Planti ol provinsal tim em ol bai yusim Nesanel Sempionsip long mekim wok redi long pilai long

PNG Gems long Disemba.

Ol i ting olsem Sempionsip bai kamap long Pot Mosbi, tasol APNG i kisim toksave long las wik olsem Sir John Guise Stediam em ol bai no inap long yusim bikos Osenia Soka Tonamen bai kamp na ol i salim Nesanel Sempionsip i go long Lae.

Melanesien Sempionsip bai kamap long Fiji long mun Julai, 2016.

Presiden bilong APNG, Tony Green, i tok olsem, dispela resis bai no inap long kamap wantaim Melanesien Gem bikos Melanesien Gem em i nupela Malti Spot Gems we ol i no statim yet.

Melanesien Sempionsip long Fiji

em bilong etletiks tasol na ol bai lukluk long ol tim long Vanuatu, Solomons, Rijinal Australia, Norfolk Ailan, Nu Kaledonia, Kiribati, Tuvalu, Papua Niugini na Fiji bai resis long open na anda 18 resis.

Las taim dispela resis i bin kamap long 2005 long PNG na dispela i kamap namba wan tru, tasol wankain resis i no bin kamap orait long Polinesia na Maikronesia na Osenia Etletiks i stopim dispela aida.

Bihain long rivi bilong resis program, Osenia Etletik i lukluk long kamapim gen sab rijinal sempionsip wantaim sampela senis we

dispela resis bai kamap insait long tupela yia taim, na ol i lus tingting long kamapim ful Osenia Sempionsip long olgeta yia.

Wol Junia Sempionsip bai kamap long Polan bihain long Julai na Eletik PNG i lukluk long kwalifaim tupela etlit long dispela resis.

Afure Adah i kwalifai long 200 mita resis na Ephraim Lerkin i bin soim gutpela kala bilong em dispela yia na em i inap long kamap kwalifai.

"Ephraim i soim gutpela kala long ol resis bilong dispela yia pinis," Green i tok.

"Mi tok tenkyu tu long Nesanel

Geming Kontrol Bod (NGCB) long givim mani long em i go long Fiji na Adelaide long skul holide."

Etletiks PNG i sindaun long namba tri tem skul holide wik long septemba bilong Rijinal Sempionsip bai kamap long Sauten, NGL na Momase rijon. Dispela sempionsip em i namba wan tes bilong ol etlit husat i redi long PNG Gems.

Presiden Tony i tok moa olsem, ol bai stat long dispela yia wantaim skul resis program.

"Dispela em i tripela rot patnasip namel long Etletiks PNG, Dipatmen bilong Edukesen na PNG Spot Faundesen," Green i tok.

SP Bruweri i sponsa long CPNG

SP BRUWERI i amamas long tokaut long em i sponsa long Kriket PNG (CPNG) wantaim K200, 000 long dispela yia long opisal lons i kamap long Epril 07 long SP Bruketel, Pot Mosbi.

Dispela sponsa bai helpim CPNG long developim hai pefomans program bilong ol Nesanel Tim, HEBOU PNG Barramundis na City Pharmacy Lewas.

SP Bruweri i bin sponsa long CPNG bipo na nau tu bai strongim rilesensip wantaim CPN-Ganinit long nupela ekspot bren Radler.

"Long makim maus bilong Kriket PNG Bod, menesmen, ol woklain na sapota bilong kriket, mipela i amamas olsem SP Bruweri aninit long nupela bren Radler i welkam long sapotim CPNG," Jenerel Menesa bilong CPNG, Greg Campbell, i tok.

"Dispela em i no nupela patnasip, nogat. SP Bruweri na CPNGi gat histori na mipela i lukluk long kamapim dispela rilesensip wantaim strongpela promis long nau na bihain taim."

Campbell i pinisim toktok bilong em na i tok olsem disiplin em i

bikpela samting long ol kriket pilai insait long pilai graun na ausait wantaim.

Planti ol man na meri pilai bilong Nesanel kriket tim i bin stap wantaim long dispela bung. Kosa bilong ol, Dipak Patel, tu i bin stap wantaim ol pilai bilong em long wankain taim.

Nesanel Tim bilong ol man, HEBOU PNG Barramundis i go bek long trening na i redi long namba wan intenesenel asples gem resis egen-sim Kenya long long Amini Pak long Mei 28 inap 30.



Piksa i soim ol pilai bilong HEBOU PNG Barramundis i soim K200, 000 sek we SP Bruweri i sponsa long Kriket PNG.

Spot Patna i bringim helt toktok i kam long ol pikinini

PAPUA Niugini Olimpik Komiti (PNGOC) aninit long Olimpik Velyu Edukesen Program na Etlit Komisin insait long patnasip wantaim Lig Bilong Laip bilong NRL PNG na Kriket Blo Olgeta bilong Kriket PNG i bin amamas long Intenesenel De bilong Spot bilong Developmen na Pis (IDSDP) na Wol Helt De wantaim ol Sumatin bilong Tokarara Praimeri Skul long Pot Mosbi long las wik Fonde.

De bilong IDSDP i save kamap long Epril 6 na Wol Helt De long Epril 7, tasol ol i bin joinim tupela de wantaim na i strongim ol gutpela sait bilong spot na kamapim ol gutpela pipel long bihain taim.

Ol sumatin i bin pilai ragbi na kriket na tu, ol i bin kisim sampela skul toktok long helt sait.

Mark Mom bilong NRL PNG, i tok olsem, mipela i amamasim dispela de wantaim ol dispela ektiviti bikos mipela i laik skelim ol skul toktok wantaim ol sumatin long



Ol sumatin i pilai long IDSDP na Wol Helt De.

stap helti na pilai spot.

"I gat helti tingting, gutpela pasin, respektim ol narapela em ol namba wan samting bilong ol pipel bilong Papua Niugini na mipela i laikim ol sumatin long gro na kamap strong na helti pipel bilong PNG," Mom i tok.

"Mipela i amamas long kamapim

ol dispela ektiviti wantaim Kriket PNG na PNG Olimpik Komiti bikos mipela i bung wantaim na redim gutpela ekspirians long ol gret tri na foa sumatin bilong Tokarara Praimeri Skul.

"Ol i wok hat long skul na mipela i amamas long skul long larim ol sumatin bilong ol long selebretim de wantaim mipela."

Astingting bilong helt long dispela yia em ol i lukluk long daibetis, na ol i lukluk long kaikai ol gutpela kaikai long abrusim dispela sik.

Tokarara Praimeri sumatin, Wendy i stap long gret foa i tok olsem em i save laik long lukim NRL em i lukluk long pilai ragbi long bihain taim.

"Mi lainim long pasim bal na pilai wantaim ol poro pilai bilong mi long skoarim ol trai.

"Na tu, mi no save kaikai ol kaikai i save i gat gris we ol i ken kamapim ol sik olsem daibetis," Wendy i tok.

Sampela bipo na nau etlit bilong PNG i joinim ol sumatin long ol ektiviti na strongim ol long disaplin na wok hat long skul.

"Yupela i mas kaikai ol gutpela kaikai long gaden na stopim ol kaikai long stoa olsem sof dring," PNG Pawalifita, Linda Pulsan, i tok.

Bipo kepten bilong PNG Barramundis, Chris Amini, i tok olsem daibetis em i laipstail sik we dispela em i bikpela wari long Papua Niugini na em i namba wan samting long givim ol skul toktok long ol sumating taim ol i liklik yet.

"Namba wan rot bilong karimaut ol skul toktok em mipela i ken skulim ol sumatin na ol i ken go long haus na skelim wantaim famili na poro bilong ol long komyuniti bilong ol long daunim dispela sik," Amini i tok.

"Olgeta lain i mas save long dispela sik na ol i ken kaikai ol gutpela kaikai long abrusim dispela sik.

"Gutpela kaikai i ken mekim ol

long kamap namba wan na strongpela etlit. Na mipela i toksave yet long ol sumatin bikos, sapos ol i laik makim Papua Niugin long Ragbi Lig, Kriket o long ol narapela spot long bihain taim em ol i mas kaikai gut na stap helti olgeta taim."

Program Kodineta bilong PNGOC, Shareena Tanabi, i tok tenkyu long NRL Lig Bilong LaifKriket Blo Olgeta bilong Kriket PNG long bung wantaim long dispela taim long amamasim de na em i tok tenkyu tu long ol sumatin i stap wantaim na pilai long sampela ektiviti long makim IDSDP na Wol Helt De.

"Spot i gat planti ol skul toktok na helti laipstail em i wanpela bilong ol," Tanabi i tok.

"Ol sumatin bai kamap bikpela manmeri bihain long strongim kantri bilong yumi na mipela i nidim ol helti pipel na helti lida long lukautim kantri."

Digicel Kap 2016 sisen i op



Ol kepten bilong 11 tim bilong Digicel Kap resis i lainap na werim ol nupela home gem jesi bilong ol long pablik i ken lukim. Namba wan raun bilong 2016 sisen bilong Digicel Kap bai stat long Sande, 17 Epril.

DIGICEL i opim Digicel Kap sisen bilong dispela yia, 2016, long Mande, 11 Epril, long Laguna Hotel long Pot Mosbi

Na raun namba wan bilong Digicel Kap resis bai kamap long Sande, 17 Epril, bihain long opisal sponsa bilong Digicel Kap i strongim namba 6 yia bilong ragbi

lig resis premiasip salens.

Dispela i soim olsem Digicel i redim planti rot bilong ol pipel bilong PNG long kamap spot pilaia na kisim gutpela save.

Long taim bilong lonsing, Digicel Kap i bungim olgeta 11 PNGNRL tim i save resis long Digicel Kap na NRL premiasip taitel bilong PNG.

Long wankain taim, Minista bilong Spot, Justin Tkatchenko i tok tok tu long ol niuslain na ol lain husat i stap wantaim.

Siaman bilong PNGNRL, Sudhir Guru, i tok tenkyu long Digicel i go het na sapotim premium ragbi lig resis bilong PNG.

Bihain long olgeta toktok i bin pinis, ol kepten bilong 11 tim i lainap wantaim ol nupela home gem jesi bilong ol long pablik i ken lukim.

“Ol rijonal hap bilong pilai long dispela sisen em Maunten Hgen, Mendi, Wabag, Kokopo, Goroka,

Minj na Lae long kamapim asples gem bilong ol bikos long karim Digicel Kap i go long olgeta rijon bilong kauntri.

“Ol gem long Pot Mosbi bai kamap long Nesanel Futbol Stadium,” CEO bilong Digicel Plei i tok.

Digicel i givim K50,000 long MGO

DIGICEL PNG i kamap bikipela sponsa bilong Morobe Golp Open na i givim K50,000 long golp resis bai kamap long Epril 14 inap 17 long Lae Golp Klap.

Jenerel Menesa bilong Digicel long Momase Rijon, Mirza Baig, i tok Digicel i hariap tru kamapim poroman wantaim Lae Golp Klap long sapotim Morobe Open. “Digicel i amamas long

em i kamap wanlain wantaim Morobe Open long dispela yia na dispela i redim bikipela sans long soim ol talen bilong ol golp pilaia bilong PNG na tu, long kamapim intenesenel pro golp pilaia,” Baig i tok.

“Sapotim Morobe Open i soim olsem Digicel i sanap long wanpela mak pinis long sponsa long planti lokel spot na ol tok-

tok insait long komyuniti long olgeta hap long kantri.”

Baig i givim sek mak long K50,000 long presiden bilong Lae Golp Klap, Phil Hommelhoff long pes bilong ol nius lain long Lae Golp Klap long Mande, Epril 11.

Ol gem ogenaisa bilong Morobe Open i toktok long kamapim wanpela profesenel resis.



Jenerel Menesa bilong Digicel long Momase Rijon, Mirza Baig, i givim sek bilong K50,000 long presiden bilong Lae Golp Klap, Phil Hommelhoff long Lae Golp Klap long Epril 11.

Linking our country

Reservations - Toll Free: 180 5465 email: sales.linkpng@airniugini.com.pg
Find us on Facebook: www.facebook.com/linkpng



LinkPNG



A Subsidiary of Air Niugini





DIGICEL KAP DRO RAUN 1

ROUND 1

Date	Home Team	vs	Away Team	Venue
17-Apr-2016	PRK GULF ISAPEAS	vs	SNS POM VIPERS	POM
17-Apr-2016	WAMP NGA MT HGN EAGLES	vs	WAGHI TUMBE	HAGEN
17-Apr-2016	PRK MENDI MURUKS	vs	BINTANGOR GKA LAHANIS	MENDI
17-Apr-2016	TNA SIMBU LIONS	vs	KEMELE HELA WIGMEN SIMBU	MENDI
17-Apr-2016	AGMARK RABAU GURIAS	vs	EPG ENGA MIOKS	KOKOPO
BYE	SNAX LAE TIGERS			



EM YA: Gol Suta bilong Puma Energy i lukluk long pasim bal long pilai bilong em long praivet nebal kompetisen semi fainol.



MI HOLIM: Gol suta bilong Lamana i redi long pasim bal taim pilai bilong CPL i lukluk long rausim bal long em.



U MEME: Puara i mekim wanpela hatpela takol long pilai bilong Blackhawks long pilai bilong ol long NFS. Hunters i win 11-10.



DIANA
Tuna

*Niupela Swit Teist
Nau Igat Moa Oil!*



PNG's ORIGINAL TUNA

PNG MADE  Manufactured by:
RD TUNA CANNERS LTD.



**Kaputin
i kamap
namba wan**

Rellie Kaputin i winim 6 mita long hai jamp na brukim rekot bilong West Texas A&M yunivesiti long 2016 sisen. Em i kamap namba wan jampa bilong ol meri PNG.

NAMBA wan jampa long jamp bilong ol meri, Rellie Kaputin, i winim 3-pela gol medal long 2015 Pasifik Gems na nau em i statim 2016 sisen bilong em gut olsem las yia.

Nau em i kamap namba wan meri long PNG long winim 6 mita long long jamp.

Kaputin i bin setim nesanel rekot long hai jamp, tripel jamp na long jamp long Pasifik Gems na winim olgeta tripela resis.

Long stat bilong 2016 sisen, em i brukim rekot bilong West Texas A&M Yunivesiti, US, long tripel jamp na long jamp. Em i bin winim 12.63 mita long long jamp na 5.96 mita long tripel jamp na dispela em i wankain long nesanel rekot bilong em, 12.65 mita na 5.97 mita.

Rellie i jamp gen long Sarere long Canyon na em i winim 6.02 mita long tripel jamp, tasol dispela em ol bai no inap long kaunim poin bilong em.

"Ol bai no inap long kaunim dispela poin olsem nesanel rekot bilong em bikos i gat bikipela win i kam long baksait na i pusim em long kamap long dispela kain mak. Tasol, dispela i strongim Rellie long makim bikipela mak," Presiden bilong Etlek PNG, Tony Green, i tok.

"Long dispela yia, Rellie i lukluk long soim kala na stail bilong em stret long NCAA Dsivisen Tu Nesanel Sempionsip bai kamap long pinis bilong mun Mei long Florida."

Long wankain taim, Adrine Monagi i go het long kamapim kala bilong em na namba wan rekot bilong em long heptathlon em 5021 poin aninit long 7-pela resis long San Angelo long las wiken.

Wantaim dispela, planti ol etlit bilong Etlek PNG i soim kala bilong ol long wan wan etlek resis.

● Lukim spots poto long pes 27 ● Digicel 2016 kap i op - P26 ● SP sponsa - P25



Pharmasyntez TB Drugs

Effective Treatment of TB at an affordable price.
Ask your Doctor about these products by name.
Clinic and Hospital orders welcome.

Good Products, Better Prices, ikam long

 **Johnstons Pharmacies Ltd**

P.O.Box 1066, Boroko, Papua New Guinea.
Tel +675 325 3185 Fax +675 325 0190 Email sales@johnstons.com.pg